



### Grawng Cao Tiem Lai Dee Daw

Siyiex mawh cao pa ting bwanson piang khawmuik heue. Cao pa tiem lai in, hoik sax tiem lai sivoie in (7) phuk, plak lox vax (6) phuk mai plak lox man (1) phuk, ka daux phuk lai vax an khankix, ang nyang sax tiem grawng tokaux tix tix bawg kawx, daux phuk lai in aux koe rhawm ti tiem grawng tokaux tix, sonsang kieh mawh pa yaogyaw bwanson pa yuh Siyiex ka daux krax im ju tix heue.

Sara ting Ngox khun pen mawh kawn simex ghoik Tax Ai Nap (Tax Pen) + Yiex I ka mai keh daux meung vax, daux veng Pang vai daux yaong Toilawng laong, ka daux 1956 num heue. Mawh kheu jao krax ot pa ang yienyawg kuceu, ang yaox ti gau lai tom khaw caw, 1978-1979 num yuh cao gau dau cawng gau lai Meung Mau (eung Man Pien) 1980-1983 num gau lai sigangsi daux Veng Taongjhi, 1983-1991 num, Yuh sara ceucau daux meung mau (eung Man Pien). 1991- tom singaix, Yuh sara ceucau Pang Sak mai glang Yam Yuh Sara Ceu Cao, 1990 -1995 num yuh caogix kaing cubcaw kawn nyawm numli vax (pa dha hu sivoie). 1994-1997 num yuh cao bung kaing cub caw ceucau baux veng lashio, 1998 - 2006 num yuh cao bung kaing kuceu Numli vax (pa dha hu sivoie). 2006 - 2009 num yuh cao bung kaing kuceu Numli Vax kawn khrit com rawm, 2009 - 2012 num yuh cao jhawp kaing cubcaw ceucau vax baux veng lashio, mai cao jhawp kaing ra numli vax kawn khrit com rawm, 2012 num tom hoek bawg yam tiem lai in, yuh cao jhawp kaing numli vax mai cubcaw ceucau baux veng lashio, mai cao kwang kaing cubcaw pa thong bung cawng phuk lai sigangsi vax, kheu bwon son krax caux rhawm pa shiao Siyiex heue.

Glang yam yuh kaing satsana vax, sitioe ti gau gumlox Siyiex daux cawng phuk lai sigangsi EMAWK, khaix hoik gau tix baux hoik tix baux, cawng (EMAWK) ap ti tawx lekmad (2) glawk, pa mawh B.Th mai M. Div, heue. Can pa kraí pa lao ex khawmuik mawh kheu bwon son krax caux rhawm Siyiex giexgiex heue.

## Pa Kaux Rhawm Son Ju Khaix

တမလွန်အတွက်စိတ်ချပူ



Rev. Ngox Khun Pen

## LOX NAWB

Yaogyaw ka bwanson Siyiex ting lhaong tete telai, kheu krax pa caux rhawm Nawh cao ti tawx akhwang pa mhawm ka son ex, sonsang pon tiem mai plih phuk lai grawng **PA KAUX RHAWM SON JU KHAIX** in heue. ting bwanson ka can pwi pa rieb ti teei phat ka lai in, ka daux pa thong gau khwan singax singeh cao ka ex kaux mawx kaux an, kheu ex kukaux mawh paox pa rom ti yuh kaing tau mai paox pa rom ti krai grawng krax taoh heue.

Cao pa teem ex son phuk lai in pa mawh nyiex ma Tax Ai Ka Yiex Yex Sin khun (Tachilek) kawx ting bwan son ka tete heue.

Krax pa bak keut aux ti tiem lai grawng pa kaux rhawm son ju khaix in, mawh sonsang yie ti sawg tawng grawng pa kaux rhawm son ju khaix mai sonsang chix gwieh ti tawx pwi tang kaux pon tawng ka grawng krax moh Siyiex, mai grawng krax taoh Yesux Khrit heue. Mawh kheu bwanson Siyiex, aux hoik pon tiem lai in plak lox MAN Sivoe in mai deeh baox pon thut tiem plak lox Vax bawg in heue. Daux bawg yam sivoe in, lai pa hoik tiem plak lox vax koe (7) phuk pa mawh grawng (1) ceu cao cao khrit (2) Im ju daux krax rawg bawn, (3) kao son tix son (4) Siyiex mawh mawx (5) Yesux koe alo ka kawncau mauso (6) Krax im ju kawm khrit inkix (7) Grawng krax rawg bwan inkix khankix heue.

Pa baox tiem aux lai grawng pa kaux rhawm son ju khaix plak lox man mai plak lox vax in kawx, teu koe krax cudcha ieakriang tomnie tete, viang mawh kawx nan khioxkhaw ka ex, yuh bwanson paw nyang yaox ka krax pa cudcha ngai lai mai pa iakriang plak krax pa tiem lai, phat sonsang pon gumlox Siyiex ngie khaing, mai sonsang baox rom ex ti tawx lox bwan grawng krax taoh Yesux ka pwi tang kaux pa ang nyang sax mhong ka grawng krax taoh khankix heue.

Daux krax moh Siyiex

Srt. Ngox Khun Pen

Cao Tiem lai

**KAING : LAI**

- (1) Phuk lai sigang cie Siyiex leeingju
- (2) Siyiex cao phan caoyuh
- (3) Ju piang haktiex mai ju khaix
- (4) Dee jah phimap mawh khaing Satan
- (5) Pwi pa loig khaing phimap ang koe
- (6) Phi map pa koe kuceu
- (7) laig daux mawnarok kheu phimap
- (8) Beenli mai pa mawh meh
- (9) Krax pa luan khaing mawnarok pa koe tix nyaing ngie khaing
- (10) krax moh Siyiex leeing ju
- (11) Yesux cao pa pluat ti tik phimap uik
- (12) mawnarok mawh son phimap
- (13) pa jhaxlawg mai bwanson
- (14) Cao pa pex ka mawnarok
- (15) Pa keh ra ceu mai pa yum ra ceu
- (16) Pa keh bawg tix mai pa keh bawg ra
- (17) Pa yum bawg tix mai pa yum bawg ra
- (18) krax ra nyaing mai khwan ra ceu
- (19) Pa cox khre son ju khaix
- (20) Pwi pa hoik pon pa kaux rhawm son ju khaix
- (21) Pa teei haok mai meung raoma

## PHUK LAI SIGANG CIE SIYIEX LEEINGJU

(ထာဝရဘုရား၏ သမ္မာကျမ်းစာ)

Ka piang haktiex in koe phuk lai sigang kuceu heue. Ka daux pa koe phuk lai sigang kuceu an, pa mhawm mai pa caw khaing paox tix mawh phuk lai sigang cie Siyiex leeingju, pa mawh gumlox pa mawh meh heue. Grawhgrawng nawh kheu mawh Siyiex cao phan cao yuh, Siyiex pa im ju, pa mawh Siyiex pa kaux cong leeingju, pa mawh gumlox pa im pa singax mai kheu mawh pa grum naog mai ju pa im, mai mawh phuk lai pa im ju leeingju, Pa ang chix tieh loh, pa kaux pa koe ku ju leeingju leeingphan heue.

Phuk lai sigang cie Siyiex leeingju an, mawh pa tiem can pwi pa thong gau khwan cao ka kix pwi (40) kaux khan kix ti deuh heue. Phuk lai sigang pa prim khawmuik koe (39) phuk mai phuk lai sigang pa khraox khawmuik koe (27) phuk, kleuk tau khawmuik koe (66) phuk heue, can pwi pa tiem phuk lai sigang pa mawh gumlox Siyiex in, ang mawh pwi pa koe pingnya, dee ot kix kawx ang situ awm paox tix, bawg yam pa tiem kix kawx ang awm paox tix, mawh kix pwi pa naog mai khwan singax, pa mawh pwi pa ang situ krax ot krax koe, pa mawh pwi pa tang siyox khaing paox tix, pa ang situ glawk krax ot heue. Phuk lai sigang mawh pa tiem ka daux bawg yam 1500 num heue. Mawh pa jah ti tiem plak lox pwi Yudax, khaix an baox ti thut lih plak lox ceu pwi Helasax, khaix an plak lox Romax mai plak lox kala paing, khaix an baox thut lih plak lox ceu pwi pa koe piang haktiex (2537) ceu heue. Ang awm lai can pa koe ka piang haktiex in tix ceu kawx, mawh lai pa tang pa siyox khaing can lai kuceu khawmuik heue. Hoik dawg mawh lai pa tiem tom daux bawg yam sivoe ang pwi pa chix pingnya pa raux keut khankix ang nyang bax lih koe ka piang haktiex in heue. Viang mawh lai pa hoik dawg tiem tom daux bawg yam sivoe ang pwi pa chix pingnya pa raux keut khankix, ang nyang bax lih koe kawx, mawh kheu mawh phuk lai sigang cie Siyiex, can ceu pa yaox pa tawng pwi koe pingnya khankix daux baux yamin, hoik dawg mawh pa koe daux phuk lai sigang in khawmuik heue.

Can pwi pa koe pingnya pa raux keut khankix kawx, kix ang koe dee thiang ka ceu pa hoik tiem ti deuh ka daux phuk lai sigang, mai kix rieb ti teei awm pa koe an kumu, daux phuk lai sigang Siyiex leeingju an, kheu mawh gumlox cao Siyiex pa phan pa yuh, can kawn pwi pa mawh pa hoik phan yuh Nawh Cao khawmuik, caw ti rieb yum rhawm kah tete telai heue. Phan pwi pa hoik phan Siyiex ti deuh pa mawh

pwi koe pingnya pa raux keut khankix pon rieb ti yum rhawm ka gumlox lai sigang in, can pwi khankix, nie lheu caw ti nie pon rieb ti yum rhawm kah lheu khaing an heue.

Awm pa hoik grum naog gumlox lai sigang pa prim an khankix, ka dauw bawg yam lai sigang pa khraox yam an dix, awm an can gumlox pa hoik tiem ti deuh ka dauw phuk lai sigang pa khraox khankix khawmuik kawx, hoik lih grum naog ka dauw bawg yam singaix in mai hoik pon ti yaox ka ngai tix yamin, awm pa hoik koe dauw phuk lai sigang heue. Lheu khaing an, kawm baow krao ti deuh grawng ceu pa sang lih mawh bawg phao khaix heue. Can ceu pa hoik tiem ti deuh dauw phuk lai sigang ku ceu, hoik lih mawh yamin awm pa pon ti yaox ka ngai tix ku ngaix ku sawm heue.

Phan krao lox tiag grawng in tix daog tix dawn, tix dah tix dee, sonsang nie sidawng ka grawng an, ka dauw phak lai sigang pa prim, ka dauw bawg yam sivoe ang Yexux khrit nyang bax lih hoek ka piang haktiex, sivoe an been liah siyieh (600) haoh mai aliah siyieh (700) dix, cao jhai khankix hoik dha ti tiem deuh ka grawng sang lih hoek Yesux ti keh, ka dauw veng Bieliehiem dauw meung Yudax mai grawng pa sang kham geu Nawh ti yum, sonsang tawx sang viied sang pheuex ceuk phimap kawm pwi haktiex khawmuik, mai grawng pa sang deeh kaoh im Nawh khaing krao yum ka dauw loe singaix heue. Awm pa hoik krao ti deuh an, dauw num pa hoik luan ra rheng haoh dix, Yesux khrit hoik lih keh ti tei grang nexnham kawm pwi mai lih hoek ka piang haktiex, mawh kheu nan, tom hoek bawg yam singaix in, ex pon ti yaox ka pwi piang haktiex khawmuik yuh pwie khritsimat, pa mawh pwie keh Yesux ku num, tix num tix bawg, pa mawh pwie pa kied geu kied gauw pwi kuceu kuru kah heue. Awm lox tawm jhawm krao cao Yesux tom dauw bawg yam pa hoik luan been 2000 num dix, hoik lih ti grum naog dauw bawg yam in ku ngaix ku sawm heue. Kawm sang baow grum naog hu khaix in sinyek sinyek heue. Mawh kheu jao mawh gumlox tawm jhawm krao Siyiey leeingju, phan ang grum naog pon ang doh chix tete heue. Ka dauw bawg yam singaix pa hoik luan, ka dauw bawg yam singaix in, mai ka dauw bawg yam singaix pa sang hoek khaix in, tom sidah bawg yam sidah haktiex in sax, gumlox an tak sang grum naog ku bawg ku yam tix singaix hoik tix singaix heue.

Can ceu pa tiem ti deuh dauw phuk lai in khankix, mawh gumlox Siyiey leeingju pa hoik koe ka dauw phuk lai sigang khankix heue. Ang mawh lox pa nieb tiem ka pa lak keut kawm pwi, mawh pa tei lih khaing gumlox Siyiey pa koe dauw phuk lai sigang heue.

Pa jhi ti deuh dauw gumlox Siyiey pa koe dauw phuk lai sigang (pa ahnin)

**Phuk lai sigang can pa koe khankix, mawh pa hoik phlu Siyiex bhawm mai koe bwanson son pa gau, sonsang plak jhi ti tawng phimap, mai sonsang cox dee lud, mai son pa gau ceu pa rahsee, sonsang kieh pwi Siyiex mawh pa grum naog mai pa hoik rien tix son kaing pa mhawm kuceu heue. (2 Temose 3:16)**

Gumlox tawm jhawm krai Siyiex mawh kheu mawh nawh gumlox Siyiex pa im ju, ka daux gum lox an, koe siawp sibrawm pa pon cox ka kuceu, siawp sibrawm pa pon tieh loh ka kuceu, siawp sibrawm pa chix tawng chix yung ka kuceu, mai siawp sibrawm pa pex ka can kuceu khawmuik heue. Hoik baox tiem ti deuh ahnin,

**Grawh grawng nawh gumlox Siyiex mawh pa im mai pa ca yuh, mai nie lheu lawm khaing vaid pa lawm khawm ra plak, kre pa yuh ka mawx angah mai swat laig tom kieh ju mai khwan gwieh paox tix mai laig khawm ka sinax jhong mai daux gua mai tawng ka pa bak keut pwi daux rhawm rhi tix heue. (He brie 4-12)**

Gumlox tawm jhawm krai Siyiex pa tiem ti deuh ka daux phuk lai sigang khan kix, ang koe pa cod pa lo pie tix ceu tix mu kawx, ang koe dee pa sang baox thien thie pie tix ceu tix mu kawx, hoik grum naog mai kawn ca grum naog yamin mai tak sang baox grum naog hu sinyek sinyek heue. Mawh kheu nan Yesux khrit krai ti deuh grawng gumlox Siyiex yuh nin.

**Viang raoma mai haktiex ang kaux cong kawx, gumlox Aux tak kaux cong heue. (Mathiex 24:35)**

Mawh kheu Siyiex mawh pa kaux cong jheengjheeng mai leeingju leeingphan, gumlox Nawh cao kawx, kaux cong leeingju mai mawh pa caw ti nghied ti mhong ang jud ang jai heue. Phan hoik mhong, caw ti yum rhawm kah heue. ang chix ti koe rhawm pa sang tang, caw ti yum rhawm kah tete heue. Ang chix ti koe rhawm ra mu, mawh pa yum rhawm khawmuik tete telai heue. Phan mhong ka gumlox Siyiex leeingju Yam mawx angah, caw ti sawn mawh lox pa phlangphlat Siyiex ti krai ka son tokaux tix heue. Gumlox Siyiex an mawh pa kieh khwan cao, can kix pwi pa pon khwan singax kix tiem, son pa sikah Siyiex ka kawn pwi mai pa sitioe Nawh cao ti tawx ka kawn pwi haktiex uik heue. Mawh kheu nan yam pon ti mhong gumlox Siyiex khaing phuk lai sigang yam mawx angah, caw ti rieb ka daux rhawm rhi tokaux tix; grawng mawh Siyiex pa sikah ka tokaux tix heue. caw ti rieb yum rhawm kah tete

heue. Son ju khaix sax, lheu khaing phuk lai sigang Siyiex leeingju an, can lai pa koe tang ceu khankix, ang chix pon tawx lox pawk pa rug pa kriem tix ceu kawx heue. Grawhgrawng nawh, son bawg yam pa sang hoek daux ju khaix sax, mawh Siyiex cao phan cao yuh, pa mawh Siyiex leeingju, pa pon tawng pa chix tawng tix kaux ngie khaing , mawh kheu mawh Nawh, Cao piang Cao, Siyiex piang Siyiex heue. Phan mawh lai can pa koe, pa ang mawh lai Siyiex leeingju an, mawh pa tiem hawt dong keut rhawm sawn to kaux tix, can lai an khankix, ang chix pon tawx lox pawk son ju khaix mai son bawg yam pa sang hoek heue. Phan mawh gumlox phuk lai sigang cie Siyiex leeingju in, mawh lox pa pon tawx lox pawk pa rug pa kriem son piang haktiex mai khawm son meung raoma pa mawh bawg yam pa sang hoek tom hoek daux ju khaix heue.

Phan yum rhawm ka lai pa lud khankix, tak sang hawt ti yuh pa lud awm pa koe daux lai pa lud an heue, phan yum rhawm ka lai ceu pa mawh meh, pa mawh gumlox Siyiex khankix, tom chix hawt hu hawt yuh pa khaw caw awm an heue. Lai pa tiem kawn pwi ka rhawm keut dong sawn tokaux tix khankix, ang chix grum chix caw tix bawg kawx heue. Pa grum khaw mai pa grum caw, pa ang chix koe dee lud, mawh ngie gumlox phuk lai sigang Siyiex tix ceu ngie khaing heue. Phan hoik pon mhong ka gumlox Siyiex mai phan hoik yum rhawm ka gumlox an tete telai, gumlox Siyiex pa koe Sibrawm grum naog mai siawp sibrawm pa cox mhawm mai mawh pa kham grawng son yamin mai son ju khaix heue.

Mawh kheu krax yum rhawm ka gumlox an, ceu pa tang siyox mai pa daox deng khankix tak yuh pa tieh loh ka daux ju maix mai tak kieh lih mawh ceu pa grum naog ka daux ju pa im kawn pwi heue. Gumlox phuk lai sigang hoik tiem ti deuh ahnin.

**Mawh kheu nan krax yum rhawm hoek kheu pa mhong mai pa mhong hoek kheu gum lox Siyiex heue. (Romax 10:17)**

Yam pon ti mhong ka gumlox Siyiex leeingju khaing phuk lai sigang, mawh ceu pa keut pa sawn rhawm rhi tix kah, mai mawh ceu pa sawg ti tawng kah mai mawh ceu pa cu nghied hawt yuh awm pa krai gumlox an heue. Mawh kheu gumlox an grum naog mai siawp sibrawm angah, chix tieh loh ka kuceu khawmuik angah, chix kieh jhawm saux tokaux mai jhawm saux khwan kuceu grai hu angah, chix kieh khwan pa

hoik yum deeh kaoh im angah, chix taoh kawn pwi khaing phimap mai tawx ju leeingju angah, mawh kheu mawh Nawh cao pa kham grawng son piang haktiex mai son ju khaix, caw ti rieb yum rhawm kah tete telai heue. Phan yum rhawm ka Nawh cao khawm rhawm rhi tix tete, ka dauw bawg yam an, awm pa hoik koe dauw pa tiem ti deuh plak piang, siawp sibrawm mai bwanson tak sang lih hoek ka dauw krax im ju can pwi pa yum rhawm khankix heue.

**Gum lox Siyiex mawh pa mawh meh heue. Krax pa prawng ca Nawh cao khan kix khawmuik mawh pa kaux cong jheeng jheeng heue. (Yaog yaw - 119:160)**

*Aux gauw rhawm ka gum lox maix, awm pwi pa yaow ka kraung khrai pa ngawh heue. Aux khreeing ka mai nieh mhong ka lox pie lhen, viang mawh nan aux moh ka lox beenli maix heue. (Yaog yaw 119:162-163)*



## SIYIEX CAO PHAN CAO YUH

(ဖန်းဆင်းရှင်ဘုရားသခင်)

Siyiex mawh cao pa phan ka can ceu pa koe kuceu khawmuik heue. Ceu pa ang Siyiex phan yuh ang koe tix ceu kawx, ex pon ti tawng grawng mawh Siyiex Cao phan cao yuh, kheu hoik tiem ti deuh daux phuk lai sigang heue.

Tom yam jah, Siyiex phan ka raoma mai haktiex heue. (Yam jah 1:1)

Pa koe pa ang Siyiex phan yuh ang koe tix ceu kawx (Yohan 1:3)

Hoik jhi sidawng grawng an ka daux phuk lai sigang cie Siyiex awm pa hoik koe plak piang heue. phan ang mawh cao phan cao yuh, ang koe grawng pa kok nawh mawh Siyiex heue. Phan mawh Siyiex pa rug tete, caw ti mawh Siyiex cao pa phan pa yuh heue. Siyiex pa lih koe kheu pa phan pa yuh, ang chix ti kok nawh mawh Siyiex. Siyiex pa mawh Siyiex piang khawmuik, mawh Siyiex cao pa phan pa yuh kuceu khawmuik heue. kheu mawh Nawh Siyiex pa phan pa yuh ka kuceu khawmuik, Nawh kawx tawng ka can kuceu khawmuik heue. Can kuceu khawmuik mawh cie Nawh heue. Nawh chix yuh ka kuceu khawmuik heue. Nawh mawh cao ka piang kuceu khawmuik heue. Mawh kheu nan caw ti yum rhawm ka Siyiex cao phan cao yuh khawm rhawm tix mai khawm ka dee chix keut tix khawmuik mai krub ngie ka Nawh cao heue. Mawh kheu Nawh cao mawh cao pa chix tawng ka daux rhawm rhi khwan ju kawn pwi mai tawng ka daux to kaux nexnham pwi tom hoek daux siang daux gua, kheu mawh nawh cao pa jhawp giex ti deuh khwan ju can pa koe khawmuik, caw ti yum rhawm ka Nawh khawm ka dee chix keut tix khawmuik heue. Cao Siyiex mawh Siyiex pa koe daux bawg yam pa hoik luan, daux bawg yam yamin, mai daux bawg yam pa sang hoek, mawh cao Siyiex pa giex kwang ka ju pa im mai pa yum, akhwang yum mai akhwang im ju, akhwang pa laig daux meung mawnarok mai akhwang pa deuh kaoh im, sonsang hot sibhawm angah, sonsang pon ka pa mi pa koe angah, mawh pa yuh Siyiex leeingju, mai nawh mawh Siyiex pa chix yeen ti kieh tiem mai pa chix yaog ti kieh lhaong , nawh cao yaog pwi hot lih khaing pum nyhee mai yaog ka pwi shia lih khaing pum aing pa seeing brai, mai kieh koe akhwang pa ngawm tau mai khun simiang, mai mawh Siyiex pa kieh koe akhwang pa pon ti cie sin min plak ngai piang dangngeung heue. Siyiex pa grum naog mai siawp sibrawm pa ting pa lhaong an, mawh Siyiex pa keung pa caw ti krub kah tete heue. mawh kheu mawh Nawh Siyiex ka piang Siyiex, simiang ka piang Simiang, cao ka piang cao, can kawn pwi khawmuik khawmleeing caw ti krub ka Nawh cao tete heue. kheu mawh Nawh

Siyiex cao pa tawx kawn pwi pon krax pa kaux rhawm son ju khaix, caw ti yum rhawm ka Nawh cao tix kaux ngie khaing heue.

Kheu Siyiex mawh Siyiex leeingju mai nawh mawh Siyiex pa giex kwang ka can bawg yam pa hoik luan, bawg yam pa mawh yamin mai bawg yam pa sang hoek ju khaix sax, Nawh cao tawng ka can ceu khawmuik mai giex kwang ka can ceu khawmuik, mawh kheu nan, keung caw ti yum rhawm ka Nawh mai keung caw ti krub ka Nawh cao khawm ka dee chix keut tix khawmuik heue.

Siyiex mawh pa ang chix ti yaox ka ngai tix, mai pa ang pwi tix kaux kawx pon ti yaox kah heue. kheu Nawh cao mawh Siyiex tete mai kheu mawh Nawh Siyiex pa mawh khwan, mai kheu kawn pwi phimap ang keung ang caw ti pon yaox ka Nawh cao, tom ang chix yaox ang pon yaox kah heue. Can ceu pa pon yaox chix yaox ka ngai tix khawmuik, mawh pa phan pa yuh Siyiex, ang chix ti kok mawh Siyiex tix ceu kawx heue. can ceu pa phan pa yuh Siyiex pa ang kawn pwi chix yaox ka ngai tix kawx koe tomnie ceu heue. Phan krai lox tiag grawng an, bhaung , lox, krax moh, krax kaux sijax, ceu in kix khankix rug koe tete, viang mawh nan ang chix yaox ka ngai tix heue. Phan ang yaox Siyiex ka ngai tix sang chix krub ka nawh yuh ka mawx pa ah nan, mawh pa lud keut, grawhgrawng nawh, mawh kheu pa ang chix yaox ka ngai pa ang tie mawh Siyiex kawx, koe tomnie ceu heue. phan mawh pa chix yaox ka ngai mai pa yuh kawn pwi ka taix tix khankix, mawh pa ang keung ang khaw ti kok mawh Siyiex heue. ang khaw ti nieb pon deuh kieh ot dee ot Siyiex mai ang khaw ti nieb krub nieb vai ka nawh awm mawh nawh Siyiex heue, pa yuh nan mawh pa lud tete mai pa phlangphlat ti lud ka cao Siyiex leeingju heue. Hoik tiem ka daux phuk lai sigang yuh nin,

***Cao Siyiex mawh khwan heue. can pwi pa krub ka Siyiex krub ka Nawh ka daux khwan mai ka daux pa mawh pa meh heue. (Yohan 4:24)***

Yam krub krai ex ka Siyiex, caw ti krub ka rhawm rhi pa yum rhawm, ka daux khwan, mai ka krax moh krax rhawm mai ka daux pa kaux sijax heue. Awm pa mawh Siyiex pa ang chix yaox ka ngai, caw ti krub ka Nawh ka daux pa ang chix yaox, pa mawh krax yum rhawm daux rhawm rhi mai daux khwan ju, mai daux krax moh mai daux krax pa kaux sijax heue. Can pwi pa mie ti yaox ka Siyiex kukaux, caw ti yum rhawm ka grawng pa koe Siyiex, grawng pa im ju Siyiex leeingju, mai grawng pa giex kwang Siyiex ka can pa koe kuceu khawmuik heue. mawh krax yum rhawm pa yuh nan ngie khaing pa chix kieh pwi pon yaox ka Siyiex heue. phan yuh nan, tom chix pon ka siawp sibrawp mai ka krax moh Nawh cao heue. Tak pon ti mhong ka lox

Siyiex mai pon ti tawng ti yaox ceu pa sang kieh Siyiex nawh tawng mai ka pa jhi pa gau Nawh cao ka tokaux tix heue.

Can pwi pa mie ti yaox ka Siyiex caw ti jah ka pa mhong gumlox bwan pa koe daux phuk lai sigang, khaix hoik pon mhong nawh ka lox bwan an, caw ti rieb yum rhawm ka gumlox bwan an daux rhawm khwan tix heue. khaix hoik rieb ti yum rhawm ka gumlox im ju an, pa ang chix yaox ka ngai, pa mawh khwan cao pa kaoh khaing Siyiex im ju, tak laig ka daux rhawm rhi krax yum rhawm mai ka daux krax im ju nawh mai tak ot ka daux pwi yum rhawm an tom sidah ju nawh heue.

**Ka daux Nawh kawx pex hoik mhong gumlox pa mawh meh, pa mawh lox bwan gaux rhawm pa dex mai krax taoh mai kheu hoik yum rhawm ka daux nawh, hoik tawk cum ka pex ka khwan singax pa dex mai lox sijax mukheu heue. khwan an mawh gawng ka gawng sin ex tom bawg yam sang taoh Nawh cao ka cie tokaux tix , sonsang yaogyaw min plak ngai Nawh heue. (Efesux 1:13-14)**

**(1) Chix pon ti tawng ka gawng pa koe Siyiex kheu can ceu pa phan pa yuh Nawh khankix**

Phan jhak ti yaox ka can ceu pa koe kuceu kucawng khawmuik khawm leeing, pa mawh ceu pa koe ju mai pa ang koe ju kuceu khawmuik, phan ang koe cao phan cao yuh, pon ang doh chix, mawh kheu nan, Yam yaox ka can ceu an khankix, ex pon ti tawng gawng koe Siyiex kheu ceu pa hoik phan Nawh cao ti deuh khankix heue. Yam jhak ti yaox mai keut ti tawng ka can ceu pa koe kuceu khawmuik, chix pon tawng gawng pa koe Siyiex tete telai heue.

**(2) Chix pon ti tawng gawng pa koe Siyiex kheu can ceu pa giex kwang Nawh ti deuh khawmuik heue.**

Ka daux pa giex Siyiex ti deuh kuceu khawmuik pa koe tomnie ceu an, Siyiex kieh singaix toh mai kieh singaix klip, kieh khix pang mai kieh khix yeet, kieh praix klawng tieh loh tix mai kieh koe yam raux, yam rung , Yam kwat mai kieh plak pon singaix mai plak bo koe, mai kieh bhaung phlu mai kieh lhiex lih, kieh praix veei mai kieh rawm sigritsigra koe yam haok yam lih, kieh klareem tok, kieh bhaung caox phlu, kieh kawn pwi koe bhawm laig bhawm lih, mai kieh nham hu lailing daux sinieag nham kawn pwi mai tobrie khankix khawmuik heue.

Can ceu an khankix mawh pa shiang mai Siyiex mai mawh cie Siyiex heue. Ang doh mawh pa dexdawd mai kawn pwi, mawh pa dex pa shiang mai cao phan cao yuh heue. Pa yuh nan mawh pa jhi gawng pa koe Siyiex cao phan cao yuh heue.

**(3) Chix pon ti tawng grawng pa koe Siyiex kheu pa hoik tiem ti deuh daux phuk lai sigang.**

Daux phuk lai in dee jah, hoik krai grawng pa mawh phuk lai sigang gumlox tawm: jhawm krai Siyiex leeingju heue. Phan nieb keut ti tawng ka dong keut tokaux tix, ka gumlox Siyiex mai ang tie mawh pa koe daux phuk lai sigang , ang chix ti mawh pa khaw pa caw, pwi tix kaux kawx ang chix ti yaox mai ang pon ti yaox ka Siyiex mai ang keung ti yaox ka Nawh cao heue. Sonsang pon ti mhong gumlox Siyiex mai sonsang pon ti tawng ka alo Siyiex, Siyiex hoik laug ka can pwi pa grum naog mai khwan cao khankix, mai kieh kix tiem ka phuk lai sigang heue. Yam pwi tix kaux kaux kok ka tang kaux tix kaux angah, Yam sikah ka paox tix angah, Yam nawh mhong lox krai pwi tix kaux kaux, nawh ang chix yaox ka mu lox an, awm an, viang pwi ang chix yaox ka tokaux cao Siyiex kawx, Yam phat ka phuk lai sigang mai yam pon mhong ka gumlox pa koe ka daux phuk lai sigang khankix, ex yum rhawm grawng mawh Siyiex cao pa sikah tau mai kawm pwi heue. Awm ang ex chix yaox ka lox pa krai pwi mai ang pon mhong ka gumlox an, viang ex ang pon ti yaox ka Siyiex kawx, yam ex mhong ka gumlox Nawh cao, tak tawng grawng koe Siyiex cao pa krai gumlox an heue. Awm an Yam phat Yam mhong ka gumlox phuk lai sigang yam mawx angah, een ti tawng grawng Siyiex hoik sikah ka kawm pwi khaing lox lai sigang an heue. Mawh kheu nan tom chix krai grawng sang pon tawng ka pa koe Siyiex kheu phuk lai sigang heue.

**(4) Pon ti tawng grawng pa koe Siyiex kheu rhawm rhi pa tawng ka to kaux tix**

Rhawm rhi pa tawng ka to kaux tix pa koe ka daux pwi kukaux, hoik rieb ti teei grawng pa koe Siyiex daux rhawm tokaux tix kaux mawx kaux an heue. Pwi tablah yuh ti ah Siyiex ang koe. Krai grawng Siyiex ang koe ka lox tix angah, ka been ka jhawm tix angah, viang mawh nan ka daux rhawm keut nawh, nawh hoik tawng Siyiex rug koe tete, viang nawh ang pon jhi ang pon krai grawng an tom khaw caw kawx, daux rhawm rhi nawh hoik rieb ti teei grawng koe Siyiex daux rhawm pa tawng ka to kaux tix heue. an mawh rhawm pa tawng ka to kaux tix pa hoik yuh Siyiex ti deuh koe daux kawm pwi kaux mawx kaux an heue.

**(5) Chix pon ti tawng grawng pa koe Siyiex kheu cao Yesux khrit, teei nexnham kawn pwi, hoek ka piang haktiex mai krai grawng keeing cao Siyiex.**

Kawn pwi haktiex pa ah Siyiex ang koe khankix, sonsang kix pon tawng Siyiex koe tete telai, Yesux hoek ka piang haktiex mai kham mhai rug grawng cao Siyiex leeingju mawh cao pa phan pa yuh mai grawng mawh cao krax moh krax rhawm heue. Yesux sidiex gau, pai jhawm saux pwi mai yuh mhai pa daoxdeng sonsang yum rhawm kawn pwi ka Siyiex leeingju heue. Yesux kham geu ti yum, mai deeh kaoh im, khaix an Nawh cao haok piang raoma , Nawh cao rawg bwan mai sikah tau mai keeing cao heue grawhgrawng nawh pa yuh Nawh cao nan mawh pa jhi Nawh cao grawng pa koe Siyiex ka sinax kawn pwi heue. Yam hoek Bawg yam sidah haktiex sax, Yesux tak deeh hoek ra bawg tix bawg mai prawng ca ka kawn pwi piang haktiex khawmuik daux pa rahsee awm pa koe been pa mhawm mai pa ang mhawm ka kaux pwi mawx kaux pwi an heue.

**Kawn kawn pwi tak sang hoek ka daux min plak ngai keeing tix, tau mai kawn cau Siyiex khankix, Yam an Nawh tak tawx ka pwi ku kaux awm pa hoik yuh nawh heue. (mathiex 16:27)**

## JU PIANG HAKTIEX MAI JU KHAIX

(လောကအသက်တာနှင့်နောင်တမလွန်ရေး)

Yam im ju kawn pwi ka daux ju piang haktiex in pa mawh tivud ticu khaing, pa mawh ju pa ang chix kaux cong in, kawn pwi haktiex ihih nyauxnyaux, kub yuh kaing kub laux leu tix, kub yuh kub laux, kub sum kaux kub yieh laux, kub sum simie kub vawg plix, kub mhawm krax ot kub nu krax ot, kub caw kub lud, kub cheung kub bauh, kub mi kub hot, kub nyawm rhawm kub khi rhawm, kub nyawm ot kub sau ngia, kub nyiah kub yiim, kub rieang ngai kub ceet ngai, kub yiien yawg kub sivix, mai krax ot pa tiehloh ti lih mawh kuceu, ka daux an khankix kawn pwi im ju ka daux pa ang chix kaux cong mai dee sidah khaix, kawn pwi sipub krax saux krax yum mai yaox ti gwieh hu khaing haktiex in awm paox tix khawmuik heue.

Kawn pwi haktiex khawmuik , phan hoek bawg yam yum, mawh bawg yam gwieh hu nawh khaing haktiex in heue. Phan maix lih hu khaing haktiex in, mawh sang hoek maix dee mawx, mawh sang bleeh mai ka dee mawx, mawh meung dee mawx ? mawh haktiex dee mawx? Mawh hoik keut nang maix grawng dee sang hoek tix mhawmhawm lie? Phan maix hoik keut grawng an, mawh hoik pon maix lox pawk grawng an lie? Phan maix ang nyang tawng sidawng, maix lo ti tawng kriem krie tom sidawng mhawm mhawm tom khaw tom caw heue.

Pwi tix kaux, phan nawh ang nyang bax tawng ka grawng dee sang hoek tix daux ju khaix, kaw an mawh pwi pa koe ceu pa lhat ka daux ju pa im tix heue. Ang joeng mawh nan, viang maix mawh pwi mi pwi koe tix kaux, viang maix mawh pwi koe pingnya cuyi tix kaux, mawh kheu maix ang nyang kriem ka grawng dee sang hoek to kaux tix daux ju khaix sax, kaw an mawh pa nie hot ka daux pwi pa hot, mai mawh pwi pa nie kha ka daux can pwi pa kha khankix heue. lheu khaing an koe krax caux rhawm ka kaw an awm pa mawh nawh pwi pa yaox krax khirhawm khirhi tix kaux heue. Hoik sax keut nang maix grawng in ka daux rhawm rhi tix lie? Viang maix mawh pwi koe siawp sibrawm, viang maix mawh pwi koe pingnya, viang maix mawh cao mi pwi koe, can ceu pa koe ka maix khawmuik khawmleeing, tak sang yaox ti

prah piang haktiex in, mai tak sang mawh pa nai nawk pa cux sium ka daux tiex khawmuik heue. Grawhgrawng an hoik sax keut maix ti yaox daux rhawm tix mhawmmhawm lie? Phan maix hoik keut ti yaox ka grawng in, mai phan maix hoik sawn daux rhawm rhi tix mhawm mhawm, maix tak sang tawng grawng ju khaix mawh pa kiied ting ceu son ju tix tete telai heue. Caw ti deuh an mawh pa ting daux rhawm tix, mai caw ti sawg tom pon ka daux bawg yam pa koe son maix tivud ngie khaing heue. Grawhgrawng nawh phan hoik lih hu khaing haktiex in, pwi khawmuik tak sang sipub ka bawg yam ju khaix, mai ang chix luan ang chix via khaing pwi tix kaux kawx, mawh pa laig hu pwi ku kaux heue.

Can kawn pwi piang haktiex khawmuik, Siyiex hoik yuh ti kieh mawh tokaux, rhawm rhi, ju khwan in loe ceu kleuk tau, tom lih mawh kawn pwi heue. Siyiex teei phawng tiex, phan yuh ka kawn pwi, khaix hoik phlu bhawm pa im ju ka daux meeh nawh, kawn pwi lih ti mawh tokaux pa im heue. Grawng in hoik tiem ti deuh sidawng ka daux lai yam jah simin ting (2) simin ieak (7) heue. Yam phan yuh Siyiex ka tobrie khankix, ang lai yuh awm pa phan ka kawn pwi, phan ti kieh kuceu lih koe kheu gum lox sibrawm pa ah nan. Hoik tiem ti deuh sidawng ka daux lai yam jah simin ting (1) simin ieak (3-22) heue.

Kawn pwi mai tobrie khankix ang chix awm paox tix, kiied tang siyox khaing paox tix tete heue. phan tobrie khankix yum, kheu kix ang koe khwan, khaix hoik yum kix, krax hu kix hoik sidah heue. Phan mawh kawn pwi ang lai awm an, kheu kawn pwi mawh pa hoik phlu bhawm pa im ju ka daux nawh, Yam hoik yum nawh, to kaux pa mawh tiex deeh ing ka daux tiex mai khwan ju pa kaoh khaing Siyiex deeh ing ka Siyiex cao phan cao yuh heue. Mawh kheu nan daux phuk lai sigang hoik tiem ti deuh ah nin,

**ka daux bawg yam an, phawng tiex tak deeh ka tiex mai khwan tak deeh ka cao pa tawx khwan pa mawh cao Siyiex heue. (Sidiex 12:7)**

To kaux kawn pwi, mawh tiex mai deeh ka tiex, viang mawh nan kawx, phan mawh khwan pa kaoh khaing Siyiex, tak deeh ing nang ka Siyiex cao phan cao yuh heue.

Grawng pa koe daux (Lai yam jah 1:26) tiem ti deuh grawng pa phan pa yuh Siyiex ka kawn pwi awm rieang pak peung To kaux cao Nawh heue. Pak peung pa ah

Siyiex, ang lai shiang mai pak peung tokaux awm kawn pwi, kheu Siyiex ang mawh pa koe pak peung awm kawn pwi, mawh khwan mai grang pakpeung Nawh cao mawh grang khwan cao pa ang pwi chix ti yaox ka ngai tix heue. kawn pwi mawh tiex yie chix laig rhawm ti keut ka pa dexdawd mai tiex, mai chix keut ka pa shiang mai tiex ngie khaing heue. viang mawh kawx nan pa dexdawd mai haktiex mawh pa lih ti koe tivud ticu ngie khaing, mawh kheu jao an kawn pwi tom mawh pa im tivud awm nyo sinie, mai mawh nyo piang haktiex in tivud ticu ngie khaing heue.

Grawhgrawng nawh pwi pa sau riang ti yuh kaing mai pa kied koe rhawm ti yuh kaing greem singaix kawx, sang koe bwanson ka ceu pa tix lie? singaix sawm nawh khankix mawh krax pa laux rhawm mai kaing jhaw nawh mawh ceu pa voi rhawm, yam pon sawm kawx nawh ang yaox ti lauxleu rhawm tix heue. ceu pa yuh nan kawx, mawh pa giexgoing heue. (sidiex 2:22-23)

Kawn pwi pa im ju piang haktiex in, viang coca ti yuh tom pon ka kraung khrai mau khri mai viang nawh mawh pa mi pa koe mie ding mie ghlaong kawx, viang hoik kied mhawm tom khaw caw mie ding kawx, ceu an khankix mawh ngie son piang haktiex, pa vai ti ot tivud ngie khaing heue. viang hoik yaox ti pon cie ka can ceu an khankix mai phan hoek bawg yam yum mai yam gwieh hu khaing haktiex in tix ngaix sax, tak sang yaox ti prah ghram ka can ceu an khankix mai laig hu ka daux meung kin kha (**meung mawnarok**) phan yuh nan koe bwanson yuh ka mawx pa ah nan, phuk lai sigang hoik tiem ti deuh sidawng lhaing lhaing heue.

Daux phuk lai sigang tix dah baox tiem ti deuh ah nin. Phan pwi tix kaux kaux pon haktiex khawmuik mai som ju tokaux tix, sang koe bwanson ceu patix, pwi sang teei patix taoh ka ju to kaux tix lie? (Mathiex 16:26)

Mawh sang chix taoh pwi ju tix ka ceu patix lie? siang pa ngawh kuceu mai kraung khrai mau khri khawmuik mawh ngie son piang haktiex ngie khaing heue. mawh son yam im ju pwi piang haktiex ngie khaing heue. Phan mawh ju meung rao ma son ju khaix sax, ang chix ti liag ka mau khri, ang chix loh ka can ceu pa koe piang haktiex in tix ceu kawx heue. Mawh kheu jao an, phan maix hoik pon ti koe sibrawm piang haktiex, phan maix hoik pon ti koe kraung khrai mau khri piang haktiex, phan maix hoik pon ti koe pingnya cuyi piang haktiex, mawh sang fah rhawm maix ka can ceu an khankix lie? ang koe akhwang ti viex ceu an hu pie tix ceu kawx, tak sang yaox



ti ghran prah khaix tix piang haktiex khawmuik heue. kheu caw ti sang prah ti deuh can ceu an khankix khawmuik piang haktiex in, caw ti khre rien ka ceu pa tix son ju khaix, phuk lai sigang hoik jhi ti deuh gumlox Siyiex heue.

Phan pwi pon ti cie ka ceu pa koe ka piang haktiex in, mai yam hoik sidah ju piang haktiex sax, sonsang laig daux ju khaix , phan nawh hoik khre rien mai nawh baux pon ti cie sin ju leeingju, pwi an mawh pa keung ti kok mawh pwi pa koe bwanson, pa grum pa naog ka daux keuceu khawmuik heue. Sonsang mawh pwi pa koe bwanson tix kaux, mawh pa tawng ka alo Siyiex, phan ang tawng ka alo Siyiex, mawh pa ang chix pon ti cie kah, mawh kheu nan sonsang pon ti cie ka ceu pa grum mhawm an, lo ti tawng ka alo Siyiex mai ka krax moh Nawh cao mai mawh pa rieb ti teei ka bwanson an khankix heue.

Sonsang khre rien son ju khaix, pa kiied ting ceu khaing paox tix, mawh pa im ju ex yamin heue. Ang lai chix ti keut daux ju khaix, mawh pa keut yamin mai pa tieh loh khaing phimap tix yamin, mai pa tik thieang ka can pa dexdawd mai alo kawn pwi, pa rieb ka alo Siyiex tom grum naog yamin, daux bawg yam pa im ju tix heue. Pa deuh rhawm ka ceu pa koe piang haktiex in, pa mawh kraung khrai mau khri, min plak ngai, siawp sibrawm, pa ao ceu kaux mai pa ao min, an khankix mawh son tivud ngie khaing mai mawh pa ghran pa prah ka ceu pa koe leeingju son ju khaix ang mawh lie? caw ti keut daux rhawm rhi tix tom raux, pa ang koe ang chix pa ang sawg ang pon son ju khaix, mawh pa tix pa ah nan, caw ti sawg yamin, ang lai chix ti tok bawg yam, mawh yamin ngie khaing heue. ka daux lai sigang hoik tiem ti deuh ah nin,

**Sawg ka Siyiex yam kawn pon ti yaox ka Nawh cao, rawg bwan kok ka Nawh cao yam kawn dex Nawh cao heue. Kieh pwi caox tik vud ka krax pa hu tix mai pwi pa ang rahsee tik vud ka krax keut tix, kieh nawh deeh ing hoek ka Siyiex mai Siyiex tak koe krax caux rhawm ka nawh mai hoek ka Siyiex ex, mawh kheu Nawh cao tak yuh krax pluat ploi phimap pa kied ting heue.(Isayah 55:6-7)**

Pa tiem ti deuh daux phuk lai sigang pa ah bawg yam pa pon ti yaox an, sang ah ka bawg yam pa im ju kawn pwi ka piang haktiex in tivud ticu heue. Bawg yam pa im ju kawn pwi pa ah nan, sang ah ka pa im ju yamin heue. Pa im ju kawn pwi an ang mawh cie kawn pwi, ang mawh pa shiang mai kawn pwi, mawh pa shiang mai Siyiex

mai mawh cie Siyiex heue. mawh kheu nan can krax im ju kawn pwi khawmuik, mawh kheu Siyiex mai mawh ka daux Siyiex heue. mawh kheu nan ju pa im kawn pwi khawmuik, mawh pa im sonsang rieb ti teei ka krax moh Siyiex mai mawh sonsang rieb ti yum rhawm ka Siyiex mai krub ka Nawh cao tix kaux ngie khaing heue. In ngaix mai pa sax, pa ah nan ang mawh cie kawn pwi, mawh cie Siyiex mai mawh son Siyiex heue. Kawn pwi caw ti tik vud ka jhawm keut tix mai niied ti tieh loh rhawm rhi tix, mai lo ti niied hoek ka cao Siyiex leeingju heue. Phan yuh nan Siyiex tak sang caux rhawm mai tak pluat ploi phimap can pa koe nawh khawmuik khawmleeing heue.

Bawg yam pa pon ti yaox pa ah nan, sang ah ka bawg yam domin heue. Kawn pwi mawh awm pa koe lox tiag pa ah nin, taix pa buk, sivoie ang nyang bax rah, taix pa rah, sivoie ang nyang bax buk, tix ghiep ngai, tix pluk plieak praix, ka daux bawg yam tivud khaing, kawn pwi chix koe pa tiehloh mai pa tang siyox kuceu, mawh kheu nan gumlox Siyiex tom tawx satix ka kawn pwi awm pa koe daux phuk lai sigang heue. Mawh kheu nan can krax mi krax koe mai kraung khrai mau khri, mai krax pa tawng pa yung ang chix ti deuh ka piang krax keut tokaux tix, mawh pa caw ti deuh ka piang gumlox im ju Siyiex cao phan cao yuh, pa mawh Siyiex cao pa giex ju jhawp khwan kawn pwi mai pa mawh Siyiex cao pa kwang ju in mai ju khaix, tom hoek ju leeingju, pa mawh Siyiex pa ang chix tiehloh, pa koe leeingju leeingphan heue.

Phuk lai sigang hoik tiem ti deuh, ju pa im piang haktiex in , mawh sonsang khre rien ka son ju khaix heue.

Ju aux koe ka daux taix tokaux aux jheeng jheeng heue. viang mawh kawx nan aux ang pi awm ka beenli maix heue. (Yaog yaw 119:109)

Yam im ju piang haktiex in, viang mawh pwi mi pwi koe ka kuceu, mai mi koe ka kraung khrai mau khri tomnie ceu kawx, phan ang nyang koe ceu pa kaux rhawm ka son ju khaix, pa koe khawmuik mawh pa giex pa going ngie khaing heue. mawh kheu nan awm pa hoik tiem ti deuh plak piang tin, viang koe ceu pa yuh ka mawx angah, phan ang koe krax pa hoik kaux rhawm son ju khaix, krax im ju an mawh pa nai pa nawk mai mawh krax im ju pa ang koe bwanson, pa mawh giexgoing ngie khaing heue.

Can pwi pa deuh ju khaix mawh pa ting ceu mai keut son ju khaix pa mawh ju leeingju an, viang yaox ti ot ka daux pa grum naog gaux rhawm angah mai viang yaox

ti ot ka daux pa khi rhawm ieak riang angah, nawh tak maong ti jhak mai krox jun ka pa sang lih bleeh mai nawh tak ca keut ngie ka grawng an daux rhawm rhi tix jheeng jheeng heue. Grawhgrawng nawh ju piang haktiex mawh tivud ngie, ang doh pon loh ti cie ka ju leeingju leeingphan heue. Sonsang laig daux ju pa im leeingju daux ju khaix sax, bawg yam im ju kawn pwi yam in, mawh pa ting ceu awm in plak greem khankix heue.

1. Caw ti mhong ka gumlox tawm jhawm krai Siyiex mai caw ti rieb yum rhawm ka gumlox an tete telai heue.
2. caw ti yum rhawm mai krub ka Siyiex cao pa phan pa yuh kuceu pa mawh Siyiex leeingju pa koe tix kaux khaing heue.
3. Caw ti yum rhawm grawng pa kham geu Yesux ti yum piang khaoxlhak tang phimap kawn pwi khawmuik mai pa hoik preet yeet ka phimap mai hoik yuh laux ka krax pa lud loe kawn phimap khawmuik heue.
4. Caw ti doh keut mai kleueh ka kaing phimap krax phit lud tix, mai tieh loh rhawm rhi ti hoek ka Yesux cao taoh sonsang lih mawh pwi khraox daux khrit heue.
5. Caw ti im ju daux Yesux khrit, mai krub ngie ka Nawh cao tix kaux khaing tom sidah ju tix heue.

Can kawn pwi piang haktiex khawmuik khawmleeing , mawh kawn phimap, ang koe pwi pa grum mhawm pie tix kaux kawx heue. Pwi ku kaux tang koe krax pa iak riang kaux mawx kaux an heue. ceu pa iak riang an khankix lih koe kheu phimap, dee sidah khaix mawh pa yaox ti kham geu daux meung kinkha mawnarok heue. sonsang lawdluan khaing krax pa kinkha mai sonsang yum rhawm ka cao taoh Yesux khrit , Siyiex kieh kawn pwi im ju ka piang haktiex in heue. Phan krai tete, krax pa im ju pwi piang haktiex in, mawh sonsang niied ti doh keut ka phimap tix mai sonsang tieh loh tix khaing phimap mai sonsang niied ti yum rhawm ka cao taoh Yesux heue. khaix hoik yum rhawm ka Yesux, niied ti coca im ju hawt alo Siyiex glang kawn im ju tix tivud mai yuh alo Siyiex tom sidah ju tix heue.

## DEE JAH PHI MAP MAWH KHAING SATAN

(အပြစ်အစ စာတန်မာရ်နတ်က)

Dee jah phimap mawh khaing satan pa ah nan, mawh kheu yam jah phimap ti lih koe, mawh pa yuh Satan heue. Satan mawh pa Ja ti yuh phimap heue. Yam jah Siyiex ti yuh kawn cau raoma koe tomnie, mai kieh kix mawh cao pa giex kwang ka piang khawmuik heue. Ka daux kawn cau raoma tomnie an khankix, Siyiex kieh kawn cau pa giex kaing koe mai ceu kaux nawh mawh simuing toh grieang ngawb mai kieh nawh mawh cao jhak cao kia cao kwang ka can ceu cie Siyiex khankix khawmuik heue.

Ka daux bawg yam tix ngaix, kawn cau raoma pa giex kaing pa kwang kia an, koe jhawm vao rhawm lhaong ka daux rhawm nawh kheu pa koe siawp sibrawm mai min plak ngai nawh ka piang ceu pa phan Siyiex ti deuh khankix, nawh keut ka daux rhawm rhi tix yuh nin, Aux tak sang haok ka piang raoma heue. Aux tak sang yaog dang ngeung aux deuh ka pieang simuing Siyiex khankix, Aux tak sang ngawm ka pieang gawng lhaong plak jee heue. Aux tak sang yuh ti awm Siyiex pa lhaong khaing paox tix, nawh keut daux rhawm to kaux tix yuh nan heue. Siyiex hoik tawng daux rhawm keut nawh mai krax ting jhawm nawh, mawh kheu nan Siyiex tiied ti tik nawh mai can kawn cau nawh khankix lih hu khaing dee ot kix mai kix prungprang rairwad kudah kudee ka piang haktiex ku dah mai lih ti mawh phicaox pa koeng pa khoi pa seeing pa brai, pa jeeh pa nyaw pa ot ka daux pa faik khankix heue. (Isayah 14:12-17)

Can satan phicaox an khankix, dee sidah krax kix mawh daux simeeig meung maranax heue. (Isayah 14:15) Daux phuk lai sigang pa khraox baux tiem ti deuh ahnin Cao Yesux ahnin, Yam an ka kix pa ot plak taix khawn goix Nawh kawx, Nawh tak sang ahnin, pex pa mawh pa hoik jhax lawg eue, lih khaing Aux mai laig ka daux ngu leeingju pa hoik cox son phicaox mai kawn cau nawh khankix heue. (Mattiiex 25:41)

Satan mawh pa lih koe khaing kawn cau raoma pa lhaong rhawm pa ting jhawm heue. mawh kheu nan, dee sidah khaix can satan mai phicaox pa seeing pa brai an

khankix, tak yaox ti taing laig ka daux glah ngu leeingju pa mawh dee greeik rhang, pa kok mawh dee kinkha meung mawnarok heue. Mawh kheu nan sonsang hu tau mai kix ka dee an, satan tom sawg ti nyaw glaw mai sawg ti jeeh nyaw ka kawn pwi piang haktiex in kudah kudee sonsang laig pwi ka daux meung kinkha an heue. Grawh grawng nawh satan hoik dawg mawh pa keut ti yuh ceu pa ang mhawm mai nawh kawn ca baox keut ceu pa ang mhawm daux rhawm rhi tix ku jheeng jheeng tom sidah bawg yam cie nawh heue. krax keut pa hoik dawg koe ka daux nawh an, ca kawn koe tom sidah ju nawh, mawh kheu jao krax keut pa ang mhawm, sawg ti jeeh nyaw ka kawn pwi haktiex, sonsang koe paoxpie pa laig daux mawnarok meung kinkha tau mai nawh tomnie heue.

## PWI PA LOIG KHAING PHIMAP ANG KOE

(အပြစ်တင်းသူမရှိ)

Can kawn pwi piang haktiex in khawmuik mawh pa hoik lih hoek khaing doeh ru Adam Evax pa mawh ru tax guah mai yiex lih heue. Kheu hoik lih hoek kawn pwi khaing Adam mai Evax, pwi tix kaux kawx ang chix via khaing phimap kukaux pwi heue. Pa ang koe phimap ang chix koe ka piang haktiex in, pon ang chix koe tix kaux kawx, pon ang doh chix koe tix kaux kawx heue. Mawh kheu jao an phuk lai sigang tom hoik tiem ti deuh ah nin,

Pwi pa yuh kaing pa mhawm pa ang koe phimap, pwi grum mhawm ang koe tix kaux kawx ka pieang haktiex in heue. (Sidiex 7:20) Daux lai sigang in hoik tiem ti deuh sidawng grawng pa pwi pa ang yuh phimap pa grum mhawm ang chix koe tix kaux kawx heue. Kawn pwi khawmuik hoik mawh kawn phimap mai tak yum kheu phimap tix heue. Sivoe ang nyang yum, kawn yaox krax khirhawm kheu ceu pa ih pa nyaux tix, krax pa ot pa koe tix mai son pa lo daux krax im ju tix kuceu mai taug mao suhshiah lunglieang, ot ang mhawm ngawm ang singeh, daux krax im ju tix ang jud ang jai, ka daux an, kawn koe krax ting rhawm lhaong ngai, krax song rhawm song rhi mai krax pa ang rah ang see ka piang paox tix heue. Bawg tiblah koe krax lhat krax graung, bawg tiblah cai rhawm sang ih sang nyaux, bawg tiblah koe rhawm pa mie pa ghoing , kawn koeng rieang cieang khoi ka paox tix, kawn salao grawng paox tix, kawn koe krax tud krax rhim mai krax gut kheem ka piang paox tix, kawn coh paox tix mai kawn tap toi mai pah puing ka paox tix mai yuh kaing pa ang mhawm ka piang paox tix heue. Can ceu kaing pa ang mhawm an khankix, lih ti koe kheu hoik dawg koe riah nawh pa mawh phimap pa koe ka daux kawn pwi tom yam jah dix heue. Grawng ceu pa yuh pa caox kuceu, hoik mawh mhai rug grawng pa mawh kawn pwi kawn phimap, grawng pa koe phimap ka daux kawn pwi, grawng pa mawh kawn pwi siliex phimap heue.

Phimap khankix mawh pa kieh lih koe can ceu kaing pa ang mhawm kuceu heue. Can ceu kaing pa ang mhawm khawmuik kawx, mawh pa lih hoek kheu phimap heue. Awm pa koe been ang khaw caw mai ceu pa ang rah see khankix ka daux kawn pwi, hoik mawh mhai rug phimap pa koe ka daux nawh mai hoik jhi grawng pa koe phimap nawh mai grawng pa mawh nawh kawn phimap heue.

**Kawn pwi khawmuik hoik lud daux krax Siyiex heue. Kix hoik cux sium awm paox tix khawmuik heue. Pwi pa yuh kaing ceu pa mhawm ang koe, pon ang koe pie tix kaux kawx. (Yaog yaw 14:3)**

## **PHIMAP PA KOE KUCEU**

(အပြစ်အမျိုးမျိုး)

Phimap koe ra ceu, pa mawh phimap pa dawg koe mai phimap pa lud yuh, phimap pa dawg koe mawh phimap pa hoik dawg koe ju Adam mai Evax, pa mawh phimap pa koe tom yam kawn ot pwi ka daux vaig miex tix, pa ang lo ti yuh pa hoik dawg koe dix heue. Phan mawh phimap pa lud yuh, mawh pa yuh kawn pwi ka tokaux tix pa lud loe tix ku singaix, pa lud yuh ka tokaux, ka rhawmrhi, ka ngai jhak yhaok mhong, mai ka lox krai jheeh jhai tix mai ka khawm tokaux tix khawmuik, an mawh phimap pa lud yuh heue. Phuk lai sigang hoik tiem ti deuh ahnin, *Grawh grawng nawh aux hoik viex phimap tom yam keh aux mai tom yam ot aux ka daux vaig miex tix heue. (Yaog yaw 51:5)*

Phuk lai sigang baox tiem ti deuh ahnin, *Pwi pa ang rah see khankix koe rhawm rhi pa caox ka daux nawh tom yam kawn ot nawh daux vaig miex tix, chix pie lhen mai chix lud krax hu tom yam keh tix heue. (Yaog 58:3)*

Pwi tiblah ah nin phan ex ang yuh phimap ex chix koe phimap yuh ka mawx, yie chix keut yuh nan heue. phimap ang lai mawh pa yuh, mawh pa hoik dawg koe ka sivoe ang nyang bax yuh, kheu hoik dawg koe tom yam kawn ot pwi daux vaig miex tix, awm pa hoik pon ti tawng khaing phuk lai sigang pa hoik tiem ti deuh plak piang tin heue. sivoe ang nyang bax yuh phimap - phimap hoik dawg koe, mawh pa hoik dawg koe tom ju Adam mai Evax dix heue. Mawh kheu yuh ex phimap, ex tom koe phimap ang lai mawh, mawh kheu koe phimap ka daux ex, ex tom chix yuh phimap heue. Krax gau grawng phimap ang sax koe, sonsang chix yuh pwi phimap, ang lo pa gau ti yuh phimap, mai ang sax koe krax gau son phimap tix bawg kawx heue. Pwi kukaux sidaing cheung ka yuh tix phimap, kheu hoik dawg koe num riah phimap ka daux kawn pwi khawmuik heue. Pa pie lhen, pa meed rhawm song rhawm, pa bo rhawm bo rhi, pa ting rhawm lhaong rhawm, pa mie pa ghoing ka cie pwi, pa saux rhawm mai pa laux rhawm khankix mai can ceu kaing pa ang mhawm ang khaw khankix ang lo ti pheuk mai ang lo ti gau, mawh pa lih koe kheu phimap heue.

Mawh kheu hoik dawg koe phimap pa ang yuh, pa dawg koe ka dauk kawn pwi tom ju Adam Evax mai pa koe tom dauk vaig miex tix an, kawn pwi ku kaux tom lih ti chix yuh phimap pa mawh phimap pa lud yuh kuceu heue. Phimap pa lud yuh koe kuceu mai ang dak uik simin heue. Phimap pa lud yuh ka tokaux tix kuceu, phimap pa lud yuh ka jheeh mai lox krai tix, phimap pa lud yuh ka rhawm keut tix, can phimap ceu an khankix, mawh phimap pa lud yuh heue. Mawh kheu koe phimap pa hoik dawg koe, phimap pa lud yuh tom lih ti koe khaix heue.

**Kawn pwi khawmuik hoik lud krax mai hoik cux sium awm paox tix khawmuik, pwi pa yuh pa mhawm mhiem ang koe pie tix kaux kawx heue. (Yaog Yaw 53:3)**

Kawn pwi kukaux, yam lih keh nawh khaing vaig miex tix, nawh yiem khawm lih hoek tix heue. Pa yiem nawh khawm lih hoek tix an, mawh pa kham mhai rug grawng pa kied kha rhawm tix, yam lih hoek ka piang haktiex in, kawn lheu kin khaing yam ot nawh dauk vaig miex tix heue. Tom yam ot dauk vaig miex tix hoik koe krax saux heue. Kawn pa koe dauk vaig miex tix an, hoik yaox nawh ti kham geu awm pa kham geu miex tix heue. Phan miex nawh koe krax saux tix ceuceu, kawn pa koe dauk vaig miex nawh an kawx , hawt saux tau mai miex tix awm an heue. Yam lih hoek ka piang haktiex, kheu mawh haktiex dee koe phimap, nawh nie lheu koe krax kham geu lheu khaing yam ot nawh dauk vaig miex tix heue. Yam kawn taug lih nawh khaing vaig miex tix dommawx doman, bhaung phlu ka nawh mai yaox ti sipub ka bhaung heue. Khaix an yaox ti sipub ka rawm kheu sighrah nawh ka rawm heue. Yam pat maox situing nawh, baox yaox ti sipub ka gawn ka kraung lawm, phan ang mawh nan ka vaid ceu pa lawm tix ceuceu heue. Pa hax pa sikiied kuceu, rawm teeh mai priex ih rawm nyaux kuceu, yaox ti sipub ka dauk krax im ju tix ka piang haktiex in ku ngaix ku sawm, jah tom yam keh tix, tom sidah hoek yam yum tix, yaox ti sipub ka krax tug krax kha kuceu mawh kheu jao phimap pa koe tomnie ceu an heue. Can ceu krax nu an khankix khawmuik, mawh pa lih koe kheu phimap heue.



## LAIG DAUX MAWNAROK KHEU PHIMAP

(အပြစ်ကြောင့် ငရဲသို့ ရောက်ခြင်း)

Phimap pa ah nan sang ah ka pa kha rhawm giex giex heue. Yam im piang hak tiex in, phimap kieh lih koe krax tug krax kha tomnie ceu heue. Yam hoik luan khaing haktiex in daux ju khaix sax, kieh kawn pwi laig daux mawnarok dee kinkha pa mawh krax yum leeingju heue. Mawh kheu nan phuk lai sigang tom tiem ti deuh grawng pa koe phimap mai yaox ti laig ka daux meung mawnarok kheu phi map heue. (Mathiex 23:33)

Pwi piang haktiex khawmuik mai beenli pa koe piang haktiex khawmuik, rieb ti teei mai rieb ti yum rhawm ka grawng an heue. Pwi pa thieang ka grawng an ka jheeh tix, tix kaux kaux teu yie kawn koe nhiex, viang mawh nan rhawm keut nawh mai rhawm pa tawng nawh ka tokaux cao tix, hoik dawg rieb ti teei mai hoik yum rhawm grawng pa koe mawnarok daux rhawm tix tete telai heue. Mawnarok lih koe kheu pa tix? koe pak peung nawh yuh ka mawx, koe nawh dee mawx? Phan mawh pa tiem ti deuh daux phuk lai sigang, mawnarok mawh pa yuh Siyiex ti deuh son kawn cau raoma pa caox caig pa mawh Satan mai cub kawn cau nawh khankix heue. (Mathix 25:41)

Meung mawnarok mawh dee yiemriag yiemgrai, mawh dee grieek rham, mawh dee kheem pa faik, mawh dee ang viag yum dee ang ngu yeet, mawh dee gleeing ngu mhat, mawh dung ngu mai mawh dee kinkha leeingju leeingphan heue. Mawh dee pa mie ti yum kawx ang chix yum, pa mie ti im kawx ang chix im, mawh dee pa kha rhawm ang jud ang jai ang uik ang leeing heue. Hoik kok ka dee an mawh dee yiemriag yiemyo, dee grieek rhang, dee kheem pa faik, dee ang viag kawng chix yum, mai dee ang ngu chix yeet, pa mawh dee gleeing ka ngu mhat, pa mawh dung ngu, pa kin kha ku ju leeingju leeingphan heue. Ka dee an viang mie ti yum kawx ang chix yum, mai viang mie ti im kawx ang chix im mawh dee ang chix yum mai dee im ti kha rhawm leeingju heue. Phan viag kawng khankix ang chix yum kawn pwi pa ting riang

rao sang chix yum yuh ka mawx? Can pwi pa ang yum rhawm ka Yesux, mai ang rieb ti teei Nawh cao mawh cao taoh tix khaing phimap , tak sang yaox ti hawt khaix Satan mai tak yaox ti kham geu ka dee an tete telai heue.

(Mathiex 25:30) (Maluix 9:44) (Plak jhi 20:20) (Plak jhi 21:8)

Phimap ang chix kieh lih koe ceu pa mhawm tix ceu kawx, ceu pa caox pa caig ang chix kieh lih koe ceu pa mhawm, phimap mawh pa caox pa ang mhawm, mawh pa seeing brai mai mawh pa laux pa leeing, mawh pa khirhawm pa lauxrhawm mai pa kharhawm kharhi tete heue. Pa koe tix plak phimap plak an, mawh krax kharhawm krax yum leeingju heue. Mawh kheu koe phimap, mawnarok dee kinkha tom lih ti koe, can ceu an khankix hoik tiem ti deuh daux phuk lai sigang awm pa hoik koe plak piang heue. Mawh kheu nan hoik tiem ti deuh grawng pa hoek kawn pwi daux mawnarok kheu phimap heue. Siyiex kied moh ka kawn pwi mai koeng ka phimap heue. Phimap mawh ceu pa ang rah see, mawh pa seeing brai, mai mawh ceu pa tuktiak ka alo Siyiex mai mawh pa koeng Siyiex kah heue. Phimap mawh pa ang doh chix khaw ka rhawm Siyiex tix bawg kawx heue. Siyiex koeng ka phimap, viang mawh nan Nawh cao kied moh ka kawn pwi, viang kawn pwi koe phimap kawx, Nawh ca kawn moh ka kawn pwi yam kawn mawh ex kawn phimap heue. Mawh kheu Siyiex koe alo ti kieh kawn pwi khawmuik luan khaing phimap mai lawd luan khaing mawnarok heue.

**Siyiex koe alo ti kieh kawm pwi khawm uik hoek ka daux krax taoh mai tawng ka pa mawh pa meh heue. (1 Tomose 2:4)**

## **BEEN LI MAI: PA MAWH MEH**

(ဘာသာတရားနှင့် သမ္မာတရား)

Ka piang haktiex in koe beenli ting (4) ceu. 1. Beenli Bokdax 2. Beenli khrit yan 3. Been li Isilam 4. Beenli Hindu in kix khankix heue. Khaix been li ting an (4) ceu, kawn koe beenli pa iak pa liied khankix kaing rheng ceu heue. Can beenli tomnie ceu an, mawh beenli pa jhi kawn pwi tawng grawng kaing ceu pa mhawm mai pa caox mai mawh kaing krub pwi pa koe rhawm ti krub ka been mawx been an heue. Viang beenli mawh pa mhawm mie ding angah, can pwi pa krub ka beenli an ku kaux, mawh pwi pa koe phimap khawmmuik awm paox tix, mawh kheu nan pwi tix kaux kawx ang chix pon hawt yuh lox pa tawm beenli tom grum naog, kheu mawh ex kawn phimap awm paox tix kukaux heue.

Beenli awm ngie cag pa sawg ti yaox ka jhawm saux jhawm ngia pa koe ka daux tokaux kawn pwi heue. Can cag atthrasaong, cag Isiji, mai cag can pa thawng pwi ti yaox daux tokaux nexnham, daux sinieag siang kawn pwi khankix kawn koe kuceu heue. Can cag ceu an khankix, viang kix chix sawg tawng grawng dee koe jhawm sau pwi kawx, kix ang chix pai jhawm saux pwi an kieh moi, beenli kawx awm an heue. Beenli chix jhi phimap mai pa lud loe kawn pwi, viang mawh nan ang chix pluat ploi ka phimap mai ang chix kieh pwi lawdluan khaing phimap pa lud tix heue. khaix an, beenli baox awm siliag pa chix yaox tokaux tix ka daux, phan pwi tix kaux kaux jhak ka daux siliag, mai phan nawh yaox pa koe ka piang pakngai nawh tix ceu ceu, sonsang sighrah ti tik ka pa koe piang pakngai nawh an, siliag an ang chix yuh, ang pon yuh, mawh ngie chix jhi nawh ti kieh pwi yaox ngie khaing heue. Awm an Beenli kawx jhi ti kieh pwi yaox ka ceu pa lud pwi ngie, mai ang chix cox ka pa lud an sonsang deeh kieh mhawm heue. Mawh kheu nan ceu pa hawt kawn pwi ti yuh awm pa jhi beenli khankix, mawh ceu pa kied sidaing mhawm tete, viang mawh nan, pwi tix kaux kawx ang chix pon hawt ti yuh grumgrum naognaog tix bawg kawx, mawh kheu nan pwi tix kaux kawx ang chix pon luan khaing krax phit lud tokaux ti jao beenli, kheu beenli mawh pa nhie kawn pwi yuh, mai ang yuh ti tawx ka pwi, ceu in

mawh pa chix pon tawng sidawng lhainglhaing heue. Kheu kawn pwi ang chix luan khaing phimap kheu beenli pie tix bawg kawx, mai caw ti rieb ti teei yum rhawm ka pa mawh meh pa yuh Yesux ti tawx, pa ang kawn pwi chix yuh, pa mawh pa mawh meh, kheu pa mawh meh an mawh pa chix pluat ploi ka phimap pwi mai pa tawx krax taoh sonsang pon ju leeingju heue.

Yesux ah nin Aux mawh daux krax mai pa mawh meh mai ju heue, phan ang mawh ka daux aux , pwi tix kaux kawx ang pon ti hoek ka keeing cao, ah nan heue. Yesux mawh pa mawh meh heue. Pa mawh meh pa ah nan mawh pa ang chix koe ka daux kawn pwi, mawh pa ang kawn pwi chix yuh kah, mawh pa yuh Siyiex tix tawx ka pwi mai mawh krax caux rhawm Siyiex ti tawx krax moh Nawh ka kawn pwi heue. Phan krai tix plak taix mawh pa yuh Siyiex bwanson pa ting pa lhaong ti tawx ka kawn pwi mai mawh alo Siyiex ti kieh kawn pwi pon rieb ti teei ka daux krax yum rhawm heue. Tokaux Yesux khrit mawh pa mawh pa meh tete heue. Daux phuk lai sigang hoik tiem ti krai mhai ti deuh grawng pa mawh Yesux pa mawh pa meh mai grawng pa pon luan kawn pwi khaing phimap mai pon krax taoh ju leengju kheu Yesux khrit heue. Simiang Pilat chawk ka Yesux grawng mawh nawh pwi mawx heue. Yam an Yesux pawk lox nawh ah nin awm pa koe daux phuk lai sigang pa tiem plak greem tin heue.

**Mauh kheu nan pilat chawk ah nin ka Nawh cao phan mawh nan maix mawh simiang lie? Yesux pawk lox mai ah nin ka Nawh, awm pa ah maix Aux mawh simiang heue. Mawh kheu in Aux tom lih hoek ti keh mai hoek piang haktiex in sonsang kham Aux mhai rug grawh grawng pa mawh meh, pa dex dawd mai pa mawh meh kukaux nghied lox Aux heue. (Yohan 18:37)**

Pa ang kawn pwi piang haktiex in tix kaux kawx chix yuh ka riang rao tokaux, mai pa ang chix lih mawh kheu mhawm son mhawm khwan tix, mai pa ang chix pon ka pa chix keut chix tawng tix, krax pa mawh pa mawh meh an, mawh pa yuh Siyiex ti tawx ka kawn pwi giexgiex goinggoing heue. Phan yum rhawm ka pa mawh meh pa yuh Siyiex ti tawx an, tom chix pon krax taoh mai pon krax pa lawdluan khaing phimap heue. Pa mawh meh pa ah nan, mawh gumlox tawm jhawm krai Siyiex mai tix kaux kawx ang chix yuh, mawh Siyiex tix kaux ngie khaing pa chix yuh, pa pon yuh heue. Mawh kheu pa mawh meh mawh pa yuh Siyiex son kawn pwi, can pwi pa yum

rhawm ka pa mawh meh an, tak luan khaing phimap mai pon krax taoh mai ju leeingju leeingphan heue. Mawh kheu nan gumlox Siyiex tom hoik tiem ti deuh ah nin,

**Kieh kix singax ka daux pa mawh meh maix. Gum lox maix mawh pa mawh meh heue. (Yohan 17:17). Aux kieh to kaux Tix Singax son kix, kix kawx tak kieh tokaux tix singax ka daux pa mawh meh heue. (Yohan 17:19)**

Mawh kheu nan paw kieh koe krax fah rhawm ka pa coca ti sau riang rao ti yuh hawt lox tawm beenli khankix, kheu pa coca kawn pwi ang chix kub mai ang chix grum mhawm, kieh koe krax yum rhawm ka Yesux khrit cao pa mawh meh, phan yuh nan tak pon ti lawdluan khaing krax pa prawng ciyang phimap mai tak koe siawp sibrawm pa pon yuh kaing ceu pa mhawm pa koe bwanson khankix heue. Phimap pa Siyiex ang pon pluatploi ang koe tix ceu kawx heue. Mawh ngie phimap pa Siyiex ang koe alo tix pluatploi tix ceu ngie, pa mawh phimap pa ang cu ti rieb teei yum rhawm ka pa yuh Yesux, pa mawh ceu pa yuh Siyiex ti tawx ka kawn pwi, pa ang kawn pwi chix yuh ti cie, pa mawh pa mawh meh, phan ang rieb ti yumrhawm ka pa mawh meh an, ang lai pon pluatploi phimap nawh tix bawg kawx heue. Yesux kham geu ti yum tang phimap kawn pwi haktiex uik, mai deeh kaoh im khaing krax yum mai kheu hoik pex nawh ka phimap mai meung mawnarok mai pex ka krax yum mai meung yum, pa yuh Yesux khrit an, mawh pa mawh meh heue. Kawn pwi ang chix yuh, ang pon yuh, mawh Siyiex pa yuh , mawh Siyiex pa koe sibrawm ti yuh, mawh kheu nan, pa ang kawn pwi chix yuh tix kaux kaw, pa mawh pa mawh meh an mawh pa keung pa caw ti rieb yum rhawm kah, pa yuh nan mawh pa pon krax taoh mai ju leeingju pa tawx Siyiex ka son can pwi pa rieb ti teei ka pa mawh meh kukaux heue. Lai sigang baox tiem ti deuh ahnin,

**Pwi pa yum rhawm ka kawn cao, ang hoek krax prawng ciyang, pwi pa ang yum rhawm ka kawn cao, kheu nawh ang yum rhawm ka kawn Siyiex pa koe tix kaux khaing, tom yam in krax prawng ciyang hoik hoek ka piang nawh heue. (Yohan 3:18)**

**Pwi pa yuh pa mawh meh hoek ka pa rieang, sonsang sidawng pa yuh tix, grawng mawh pa hoik yuh ka daux Siyiex heue. (Yo han 3:21)**

**Pa mawh meh**

(သမ္မာတရား)

1. Pa mawh meh mawh pa shiang pa dexdawd mai Siyiex tix kaux ngie khaing, mawh pa ang kawn pwi chix yuh mai phan Siyiex ang yuh ti tawx ka kawn pwi, pwi tix kaux kawx ang koe akhwang ti pon yuh ka riang rao tokaux tix heue. (Efesux 2:8)
2. Pa mawh meh mawh krax moh mai siawp sibrawm Siyiex heue. Ang koe pa pie pa lhen, ang koe krax pa tiehloh, mawh pa caw pa khaw pa kaux pa koe leeing ju heue. (Hebrie 13:8)
3. Pa mawh meh mawh gumlox tawm jhawm krai Siyiex pa singax singeh pa khaw pa caw pa rug pa kriem heue. (Yohan 17:17)
4. Pa mawh meh mawh tokaux cao Yesux khrit pa mawh cao taoh cao lawd kawn pwi khaing mawnarok, pa mawh meung kinkha heue. (Yohan 14:6)
5. Pa mawh meh, mawh pa prawng ca Siyiex ka daux pa rah pa see, ka daux pa khaw pa caw, pa ang lai jhak ka pakngai pwi, pa yuh hawt alo keeing Siyiex heue. (2 Thesalox nix 1:5)
6. Pa mawh meh mai pa khaw caw ang chix awm paox tix, mawh pa tuktiak ka paox tix heue. Phan mawh pa khaw pa caw, mawh pa keut kawn pwi hawt dong keut rhawm sawn tokaux tix, mawh pa ang chix grum naog son pwi kukaux, khaw caw son pwi tiblah, viang mawh nan son pwi tiblah yie ang chix khaw caw, an mawh pa khaw pa caw heue. Phan mawh pa mawh pa meh ang lai mawh nan, pa mawh meh mawh pa ang kawn pwi chix pon yuh tix bawg kawx, mawh pa ang chix koe pa ludloe pa tiehloh, mawh pa dexdawd mai alo Siyiex tix ceu ngie khaing heue. Phan krai lox tiag grawng an, phan mawh pa khaw pa caw kienieh, kawn pwi im kheu pa sawm nawh eep nyaux nawh rawm pa ah nan, mawh pa rug mawh pa khaw pa caw tete heue. Pa mawh meh ang lai chix awm an, pa mawh meh kienieh viang sawm eep nyaux rawm kawx, phan Siyiex ang tawx akhwang im ju mai kieh koe bhawm laig bhawm lih ka daux kawn pwi, kawn pwi ang chix im kheu pa ih pa nyaux heue, an mawh pa mawh meh heue. Lox tiag ra ceu tix ceu koe yuh nin, bawg yam raux lih lhiex ah nan heue, an mawh pa khaw pa caw tete heue. Viang mawh nan pa mawh meh ang lai awm an, phan Siyiex ang tawx rawm num ka tiex rawm lhiex ka ma, viang mawh bawg yam raux kawx, lhiex ang lih heue. Cao kieh lhiex lih, cao tawx koek toh singaix rieang, cao tawx pai awm tawb veei, mawh Siyiex tix kaux khaing, ang lai shiang mai krax pa khaw caw, mawh pa shiang mai ceu pa mawh meh heue. Phan baox krai lox tiag loe ceu tix ceu, pwi tix kaux im nawh kheu pa toek nawh bhawm tix heue. Phan ang toek bhawm tix ang chix im pa

ahnán mawh pa khaw pa caw heue. Viang mawh kawx nan, pa mawh meh ang lai awm an, pwi tix kaux pie glang toek nawh bhawm tix, dom mawx dom an phan Siyiex teei ka ju nawh, nawh ang lai pon toek bhawm tix heue. An mawh ceu pa mawh meh heue. ceu pa mawh meh ahnin, viang simie ti toek bhawm tix kawx, phan Siyiex ang tawx akhwang, ang chix toek bhawm tix heue. Pa toek bhawm laig bhawm lih, mawh bwanson mai mawh siawp sibrawm Siyiex heue an mawh pa mawh meh heue.

Bhawm mai bhaung ang koe ang chix, viang mawh kawx nan, pwi tix kaux kawx ang chix yuh, viang koe mau khri, viang koe sibrawm, viang koe pingnya cuyi mie ding kawx, ang chix priex ti cie bhawm laig bhawm lih, mawh pa yuh Siyiex mai mawh akhwang pa tawx Siyiex ka kawn pwi, ceu an mawh pa mawh meh heue. Daux lai sigang krai ti deuh grawng pa mawh pa meh an ahnin,

**Mawh kheu phan ang mawh ka daux Siyiex mawh pwi mawx pa sang yaox ti ih, mai mawh pwi mawx pa sang pon krax nyawm rhawm lie? Grawh grawng nawh Siyiex tawx pingnya cuyi mai krax tawng krax yung mai krax gau rhawm ka pwi pa mhawm ka plak sivoe Nawh cao, viang mawh nan ka pwi pa koe phamap. Nawh cao kieh kix yuh kaing mai khrawm sin ngao sonsang tawx nawh ka pwi mhawm, ka plak sivoe ngai Siyiex heue. In kawx mawh pa giexgoing mai mawh pa ih ka bhaung khaing heue. (Sidiex 2:25-26)**

7. Pa mawh meh an, mawh pa keih Siyiex kawn pwi pon ka akhwang pa lawdluan khaing pa ciyang phimap heue. Phan mawh beenli mai pa khaw pa caw, mawh pa coca ti kieh tokaux tix lawdluan khaing phimap heue. Viang coca kawx ang chix pon kheu beenli mai kheu pa khaw pa caw, mawh pa chix pon kheu pa mawh meh pa yuh Siyiex ti taux ka kawn pwi, pa ang chix tawx ngawh jum, pa tawx giex Siyiex ka daux krax moh Nawh cao pa kied ting, pa mawh Yesux khrit heue. Pa khaw pa caw pa gau beenli pwi yuh, mawh pa kieh pwi coca sau riang rao ti yuh tom pon, viang mawh nan, pa mawh meh ang lai lo ti coca, mawh kheu viang coca mie ding kawx, kheu ang chix pon, Siyiex tom yuh ti tawx ka kawn pwi, can pwi pa rieb ti teei ka pa yuh Siyiex an, mawh pa rieb ti teei ka pa mawh meh heue. Mawh kheu pa ang beenli chix yuh, mai pa ang pa khaw caw chix yuh, pa mawh meh cie Siyiex tom yuh ti tawx ka pwi, can pwi pa

rieb ti yum rhawm ka pa yuh Siyiex ti tawx an, rieb ti teei ka pa mawh meh heue.

**Pex tak tawng pa mawh meh mai pa mawh meh an tak sang kieh pex lawd luan. (Yohan 8:32)**

## **KRAX PA LUAN KHAING MAWNAROK TIX NYAING NGIE KHAING**

(ငရဲမု လွတ်မြောက်ရာ တစ်ခုတည်းသောလမ်း)

Yesux Khrit mawh daux krax pa pon kieh kawn phimap khawmuik lawdluan khaing daux meung mawnarok heue. Krax tang nyaing ang chix kieh pwi pon lawdluan khaing mawnarok lheu khaing daux krax Yesux nongnong, kheu can pwi pa yum rhawm ka Yesux kukaux daux pwi, ang lai hoek daux mawnarok, pon ju leeingju, kheu Yesux mawh daux krax ju heue. Son ju khaix koe krax ra nyaing ngie, tix nyaing mawh krax kha rhawm leeingju leeingphan pa mawh pa hoek ka daux meung kinkha mai ti nyaing mawh krax pa hoek meung Raoma dee ot tau mai Siyiex leeingju heue.

**Yesux ah nin, Aux mawh daux krax mai pa mawh meh, mai ju heue. Phan ang mawh ka daux Aux pwi tix kawx ang pon ti hoek ka keeing cao. (Yohan 14:6)**

Can kawn pwi piang haktiex in khawmuik, sonsang pon lawdluan khaing phimap mai krax pa taug pa mao mai sonsang pon krax nyawm rhawm gauxrhawm pwi mawx angah coca ti sawg daux krax daux blawng kaux mawx kaux an awm pa chix pa tawng tix heue. Viang mawh nan, pwi tix kaux kawx ang doh chix pon luan khaing phimap kheu riang rao tokaux tix mai kheu krax mhawm pa yuh tix mai ang chix pon luan kheu mhawm son mai kheu mhawm bwan tokaux tix heue. Grawhgrawng nawh can kawn pwi pa koe khawmuik khawmleeing, mawh kawn pwi pa iak riang awm paox tix kukaux, pwi mawx angah ang chix pon taoh ka paox tix mai ang chix pon taoh ka tokaux tix mai ang chix pon taoh ka riang rao tix mai ka krax twah krax klaung tix, ang chix pon taoh ka krax mhawm pa yuh tix tix ceu kawx heue.

Pwi tibliah keut ti sang pon luan khaing phimap mai mawnarok kheu krax mhawm pa yuh tix mai riang rao krax keut tix mai krax coca sau riang ti yuh kaing pa koe bwanson mai pa yuh lung sau riang daux krax rawg bwan mai daux krax pa yuh to kaux ti mhawm mai khre rien krax ot tix sonsang ang phit lud heue. Viang die lai yuh ka mawx kawx angah, ang chix pon luan khaing phimap kheu can kaing pa yuh tix tix ceu kawx, grawhgrawng nawh, can pa mhawm pa yuh ex uik, hoik mawh pa yuh daux



phimap, ang chix koe pa singax mai ang chix koe pa grum naog pie tix bawg kawx heue. Kheu kawn pwi mawh kawn phimap, can pa yuh pwi ceu pa mhawm viang kied mhawm mie ding kawx, mawh kheu hoik mawh kawn pwi kawn phimap, can pa mhawm pa yuh nawh an khankix, hoik lih ti seeing brai ka daux phimap uik heue. Phan krai lox tiag grawng an, hoik awm pa sau ceu pa ih, pa sidaing nyawm ka daux tawg sawm sox heue. Viang priex nyawm an nyawm mie ding angah, kheu sau ka daux tawg sawm sox, hoik lih mawh pa seeing brai , pa ang chix ti ih heue. Krax mhawm mai kaing can pa yuh kawn pwi phimap khawmuik, ang chix singax sivoe ngai Siyiex, , mai ang chix grum naog plak sivoe ngai Nawh cao pie tix bawg kawx heue.

Can kawn pwi khawmuik hoik mawh pa lud daux krax Siyiex, phit lud ka tokaux tix, phit lud ka jheeh jhai tix, phit lud ka rhawm rhi tix, phan yuh nan, can kaing pa mhawm pa yuh kawn pwi kuceu ku cawng, hoik lih mawh pa ang koe bwan son sivoe ngai Siyiex heue. Mawh kheu nan phuk lai sigang hoik tiem ti deuh ah nin, **can yix pa koe khawmuik , ang koe pa singax singeh, can ceu pa mhawm pa hoik sax yuh yix khawmuik khawm leeing, hoik awm man pa seeing brai, yix khawmuik fit hu awm lhax khaox mai phimap yix hoik taih yix hu awm bhaung heue. (Isayah 64:6)**

Can pwi pa koe phimap ka daux tokaux uik, viang nawh coca ti yuh kaing ceu pa mhawm mie ding angah, pa mhawm pa yuh nawh an, mawh pa mhawm pa koe ka daux pa seeing brai, hoik awm ceu pa ih pa jied nyawm pa koe ka daux klong pa seeing brai, viang nyawm mie ding angah, ang chix ti ih heue. Mawh kheu caw tix sighrah krax im ju tix sivoe, khaix an phan yuh ceu pa mhawm pa yuh ka mawx angah, pa mhawm an tom chix lih mawh pa khaw ka rhawm Siyiex , kheu hoik sau ceu pa mhawm an ka daux to kaux krax im ju pa hoik sighrah pa hoik singax heue. Pa sighrah krax im ju pa ah nan, sang ah ka pa yum rhawm ka Yesux heue. Khaix hoik yum rhawm ka Yesux, hoik pon pa singax kheu nham kawn Siyiex pa mawh Yesux khrit cao taoh, grawhgrawng nawh Yesux kham geu ti yum mai nham pa lih khaing Nawh cao mawh sonsang sighrah ka phimap kawn pwi haktiex khawmuik , pwi pa yum rhawm ka Nawh cao, Nham pa singax Nawh sighrah ka phimap pwi pa yum rhawm an, mai kaw pa yum rhawm lih mawh pwi pa singax daux nham Yesux kheu bwanson Siyiex heue.

Phan pwi tix kaux kaux yum rhawm ka krax moh Siyiex mai krax taoh Yesux khrit, mawh kheu bwanson Siyiex, krax yum rhawm nawh an kieh nawh singax mai

kieh nawh lawdluan khaing phimap mai pon akhwang ti mawh kawn Siyiex mai phan nawh yuh kaing ceu pa mhawm mie ding angah, can pa mhawm pa yuh mawh uik, Siyiex rieb ti teei ka daux meung raoma mai lih mawh sin meung Raoma ka son nawh daux ju khaix sax heue. Can ceu pa yuh nan, mawh pa sau krax mhawm pa yuh tix ka daux ceu pa singax, mai awm pa sau ceu pa ih pa nyawm daux klong pa singax, kheu nawh hoik sau ka daux ceu pa singax pa mawh krax im ju pa rieb ti kieh Nham cao taoh Yesux sighrah ka to kaux tix, mai ju khwan tix, Pa yuh nan tom chix lih mawh pa mhawm sivoe ngai Siyiex kheu Yesux khrit heue.

Yam yuh maix priex sonsang vai maix ka miex keeing tix, phan maix laug ti yuh ka ceu pa nie blon mhawm , pa nie lheu nyawm pa nie lheu ngawh, ka pa mawh nex to tiag, nex poh , phan ang mawh nan nex cak, Yam hoik yuh maix priex nyawm sonsang tawx ka miex keeing ti ih, phan maix sau priex pa nyawm an ka daux klong pa seeing brai pa ang sighrah ka rawm, mawh sang khaw caw lie? Mawh sang khaw ti tawx ka mie keeing tix lie? Mawh sang rieb miex keeing maix ti teei ti ih ka priex pa seeing brai daux klong an lie? Pa yuh nan mawh kaing pa nunai mai mawh kaing ceu pa ang khaw caw tix bawg kawx heue.

Pwi ti blah keut ti sang pon luan khaing phimap kheu krax tan mai krax mhawm pa yuh tix, phan yuh krax tan pa mhawm, Siyiex sang rieb ti pluat ploi phimap pa lud kawn pwi lie? Ang doh rieb kah, viang yuh ceu pa mhawm mie ding kawx , kheu nawh yuh ka daux phimap, kheu ceu pa mhawm an mawh pa koe ka daux phimap pa seeing brai, ceu pa mhawm an khankix, hoik lih ti mawh pa seeing brai, jao mawh pa mhawm pa giex ka taix pa seeing brai ka daux phimap heue. Pa mhawm ang singax kheu mawh pa ot ka daux phimap heue. Mawh kheu nan sonsang hoek ka Siyiex pa ting lhaong pa Singax singeh, kaing ting pa kied ting ceu ka piang paox tix, mawh pa ang lai koe rhawm ra mu, pa yum rhawm ka Siyiex tix ceu ngie khaing, pa deuh kaing pa yuh kawn pwi mawh pa ang koe ceu pa mhawm sivoe ngai Siyiex pie tix ceu kawx, pa appong ju tix mai krax keut krax sawn tix khawmuik ka daux tawm taix Siyiex khawmuik khawm leeing, pa plee can krax ot krax koe tix khawmuik ka daux tawm taix Siyiex heue. Khaix an mawh pa cu nghiet gumlox tawm jhawm krai Siyiex khawm rhawm rhi mai khawm ju khwan tix heue. Pa yuh nan mawh krax yum rhawm heue. Krax yum rhawm an, mawh pa rieb Siyiex ti pluat ploi phimap, mai pa rieb Yesux ti sighrah ti tik ka pa seeing brai pa koe tix khawmuik heue. Phan ang mawh nan, can krax mhawm pa yuh kawn pwi khawmuik, kheu kawn yuh ka daux phimap

mai ka daux alo kawn pwi, mawh pa seeing brai daux phimap ang koe pa mhawm sivoe ngai Siyiex, mawh kheu nan lai sigang hoik tiem ti deuh ahnin, **Pwi khawmuik hoik lud daux krax hu tix mai hoik cux sium awm paox tix khawmuik, pwi pa yuh pa mhawm ang koe, pon ang koe tix kaux kawx. (Yaogyaw 14:3)**

Lox pa yie shiao pwi mai paox tix tix gum ah nin, **“Ce u pa mhawm tix sok Ce u pa caox tix coi”** lox in rug mawh lox pa caw tete heue. Can kawn pwi piang haktiex in khawmuik, phan nawh koe ceu pa mhawm pie tix sok ngie, krax caox pa yuh nawh hoik koe kaing tix miex coi heue. Phan yuh ceu pa mhawm tix ceu, pa caox pa yuh nawh hoik koe kaing rheng kaing mheen ceu heue. Mawh kheu nan kawn pwi sang chix hoek krax taoh kheu pa mhawm pa yuh tix yuh ka mawx? Pa mhawm pa yuh nawh kawn tix sok an, sang chix pex ka pa caox pa yuh nawh kaing rheng kaing mheen lie? Ang doh chix koe been, ang doh chix khaw caw daux krax pie ceeix kawx, mawh kheu jao an phuk lai Siyiex hoik krai sidawng, grawng pa mhawm pa yuh kawn pwi awm siyuh caox ka plak sivoe ngai Siyiex heue.

Krax mhawm pa yuh kawn pwi ang doh chix kub son phimap pa phit lud nawh heue. Hak pex ang chix uik tawb ka sang pa yum kieh glip, phimap pa yuh kawn pwi awm sang pa yum tix mu, mai krax mhawm pa yuh kawn pwi awm ngie kawn hak pex tix khlawp ngie heue. Kawn maung krax mhawm pa situ mai hak pex tix khlawp an, sang chix tawb ka phimap pa awm sang yum tix mu ti chix kieh glip yuh ka mawx, ang doh chix mawh heue. Mawh bwan son pa yuh Siyiex ti tawx ka kawn pwi, pa mawh pa kub son phimap mai pa lheu ting lheu mhawm khaing krax phit krax lud mai phimap kawn pwi haktiex uik heue.

**Pex hoik hoek krax taoh kheu bwan son ka daux krax yum rhawm mai ang mawh kheu tokaux tix, mawh krax caux rhawm Siyiex, ang mawh kheu krax twah pa yuh tix, mawh kheu nan pwi tix kawx ang pon ti yaw rang di tokaux tix ka grawng an heue.(Efesux 2:8-9)**

Krax pa koe tix nyaing ngie khaing, mawh krax pa hu meung raoma, pa mawh krax taoh Yesux khrit tix kaux khaing heue. Pwi pa yum rhawm mai pa rieb ti teei Yesux mawh cao taoh tix kukaux, nawh tak pon krax taoh mai ju pa mi pa koe pa grum pa naog pa mawh ju leeingju leeingphan, kheu an mawh krax pa hu meung rao ma pa koe tix nyaing ngie khaing heue. krax pa sang hu meung raoma ang lai koe tang nyaing, lheu khaing krax pa hu ka daux Yesux khrit heue.

## KRAX MOH SIYIEX LEEINGJU

(ထာဝရဘုရား၏ ချစ်ခြင်းမေတ္တာ)

**Kaw pa ang koe krax moh krax rhawm, ang tawng ka Siyiex, mawh kheu Siyiex mawh krax moh krax rhawm heue. krax moh krax rhawm Siyiex ka ex hoik plak kieh sidawng ka daux pa ploi Nawh kawn tix pa koe tix kaux khaing hoek ka daux haktiex, sonsang pon ex ti im ju kheu Nawh heue. Krax moh krax rhawm kiexnieh, ang lai mawh kheu moh ex ka Siyiex, mawh kheu moh Nawh cao ka ex sonsang mawh pa tan, pa sang kieh ex luan khaing phimap tix heue. (1 Yohan 4:8-10)**

Kawn pwi pa jah ti koe sivoex paox tix, pa mawh Adam mai Evax, kiex lheu lox tawm jhawm krai Siyiex mai cu nghiet ka lox pa nyaw glaw Satan Phicaox, mawh kheu nan kawn pwi jah ti rau hu ka daux phimap mai lih mawh kawn phimap heue. Jah ka daux bawg yam an, kawn pwi khawmuik hoik singai hu khaing Siyiex mai lih mawh pa som pa nai ka daux phimap heue. Viang mawh kawx nan, Siyiex mawh cao pa grum naog mai krax moh krax rhawm mai koe krax moh ka kawn pwi phimap khawmuik, mawh kheu Nawh cao mawh Siyiex krax moh krax rhawm heue.

Siyiex kied moh ka kawn pwi phimap, viang mawh nan kied koeng ka phimap heue. Sonsang laug ti teei kawn pwi khaing phimap, Siyiex ploi kawn pa moh Tix lih hoek ka piang haktiex mai kham geu ti yum tang pwi phimap, grawhgrawng nawh mawh kheu moh Siyiex ka kawn pwi phimap, mai jhi grawng pa moh Nawh cao ka ex ka daux pa ploi Nawh kawn tix pa koe tix kaux khaing, pa mawh cao taoh Yesux khrit heue. (1 Yohan 4:10)

Mawh kheu kawn pwi koe phimap , Aux ang lai chix ti moh, Aux ang lai chix ti dexdawd phan Siyiex ah nan, kawn pwi sang chix pon hoek krax taoh yuh ka mawx? , sang chix luan khaing daux phimap yuh ka mawx? phan Siyiex ang moh ka kawn pwi phimap mai phan ang taoh lawd ka kawn pwi khaing daux tawm taix phicaox Satan, mawh kawn sang pon yaox ex cao taoh pa awm Nawh dee mawx, pa awm Siyiex leeingju, ang doh pon ti yaox tix dah kawx tix kaux kawx, pon ang lai chix koe heue. Siyiex mawh pa grum naog mai krax moh krax rhawm, ang lai moh ka kawn pwi yam ang nawh lai koe phimap , pie glang kawn mawh ex pwi phimap kawx, kied moh ka ex, tom tawx kawn tix mawh pa tan pa lu son ex, mawh kheu kawn Siyiex pa mawh cao taoh Yesux khrit, can kawn pwi khawmuik pon luan khaing phimap mai pon ju leeingju heue. Pa yuh nan, mawh krax moh Siyiex pa kied ting kied lhaong heue.

**Siyiex jhi mhai rug grawng pa moh Nawh Cao ka ex, ka daux pa yum cao khrit ka son ex, pie glang yam kawn mawh ex pwi phimap heue. (Romax 5:8)**

Siyiex ang lai krox ti moh ka kawn pwi yam ang kawn pwi lai koe phimap , pie yam kawn taug ot ex ka daux phimap kawx, Nawh Cao kied moh ka ex, mawh kheu mawh Nawh cao Siyiex krax moh krax rhawm heue. Siyiex pa koe piang haktiex in, pa ang tie rug mawh Siyiex tete telai, ang sax krai grawng krax moh ka kawn pwi phimap pie tix bawg kawx, grawh grawng nawh, phan ang koe krax moh krax rhawm, sang chix krai grawng krax moh yuh ka mawx? sang chix yuh kaing krax moh yuh ka mawx? Siyiex leeingju ang mawh Siyiex pa nhie pwi yuh , mawh Siyiex pa yuh son pwi, ang mawh Siyiex pa mhaing ka pwi, mawh Siyiex pa tawx ka pwi heue. Pwi mawx angah pa tawng ka krax moh Siyiex mai pa yum rhawm ka krax moh Nawh cao, kaw an nawh tak mawh pwi pa deeh moh ka Siyiex mai pa yuh son Siyiex, Nawh tak krub ka Siyiex mai nawh tak hawt alo Siyiex heue. Pwi pa yum rhawm grawng krax moh krax rhawm Siyiex ka tokau tix, krax moh Siyiex pa koe ka daux nawh an, tak lih mawh krax yum rhawm mai tak lih mawh krax im ju pa tawng ka krax moh an, nawh kawx tak deeh moh ka Siyiex mai moh ka paoxplawg paoxnyhawm tix mai ka pwi tang kaux khankix heue.

## YESUX CAO PA PLUAT TI TIK PHIMAP UIK

(အပြစ်ခပ်သိမ်းကို သုတ်သင် ပယ်ရှင်းသောယေရှု)

**Daux lai sidiex hoik tiem ti deuh ahnin, mawh kheu ang kawn pwi piang haktiex rahsee, pa ang koe phimap mai pa yuh ceu pa mhawm ang koe tix kaux kawx heue. (Sidiex 7:20)**

**Awm an baux tiem ti deuh ah nin tix dah, Siyiex ot ka piang meung raoma mai num ti jhak ka kawn pwi, pa sawg mai pa tawng pa yung ka Nawh cao koe tix kaux kaux lie? Ang koe lie? Kawn pwi hoik lud krax mai hoik cux sium awm paox tix khawmuik, pwi pa yuh pa mhawm ang koe pon ang koe tix kaux kawx. (Yaogyaw 14:2-3)**

Yam hoek Yesux ti teei nexnham pwi mai lih keh ka piang haktiex yam an dix, Nawh cao ang hoek ti teei dee ot mai ang hoek ti keh ka daux nyiex haw simiang khankix, ang hoek ka daux nyiex dee ot cao sidiex pa mawh cao giex kaing beenli khankix, ang hoek ti keh ka daux nyiex ot kawn pwi khan kix, viang ka daux nyiex pwi pa koe pingnya cuyi khankix kawx, Nawh ang hoek ti keh tan pie tix nyiex kawx, Nawh hoek ti keh ka daux kawg mawie, dee pa tiem pa seeing mai dee ot tobrie khankix heue. Grawhgrawng nawh nyiex haw simiang , nyiex cao giex kaing beenli, mai nyiex pwi koe pingnya khankix mawh nyiex dee pa naog phimap awm paox tix khawmuik heue. Ngai jhak kawn pwi mai ngai jhak Siyiex ang doh chix awm paox tix, kied tang siyox khaing paox tix tete heue. Siyiex yaox ka daux kawn pwi koe phimap

khawmmu khawmjung tix khawmuik, ang koe dee via, ang koe dee loig pie tix dah kawx heue. Mawh kheu nan yam lih hoek Yesux ti keh piang haktiex in dix, Nawh cao teei dee ot tix mai hoek ti keh ka daux kawg mawie sinax tobrie khankix heue. Phan mawh ngai jhak kawn pwi, tobrie mawh pa ang tawng praix klawng, mawh pa ang chix keut chix sawn mai ang chix tawng chix yung, viang mawh nan kix ang yuh phimap mai kix ang koe phimap heue. Kix ang awm kawn pwi, viang kix mawh tobrie kawx, kix kawn lheu mhawm khaing kawn pwi kheu kix ang yuh phimap heue. Phan mawh kawn pwi, sidaing yuh grang tix, sidaing teei been teei min tix, sidaing chix yuh ti mhawm pakpeung , viang mawh nan daux rhawm rhi, daux dong gua kix, hoik naog ka ceu pa seeing brai mai pa koeng pa khei, pa hai pa meeg kuceu heue. Siyiex ang mawh pa jhak ka rieang pakpeung kawn pwi, ang mawh pa jhak ka pa koe pa chix kawn pwi, mawh pa jhak ka sok rhawm kawn pwi heue.

**Mawh kheu pa yaox Siyiex ang awm pa yaox kawn pwi , kawn pwi jhak ka grang pak peung plak praix, viang mawh kawx nan Siyiex jhak ka daux sok rhawm. (1 Samoe 16:7)**

Yesux mawh kawn Siyiex pa ting lhaong khaing kuceu khawmuik, yuh ka mawx Nawh lai lih piang haktiex mai keh ka daux kawg mawie, ceu pa yuh nan mawh pa seeing brai mai pa bauh pa dhah, pa ang koe sire, pa ang koe min, pwi tiblax yie chix keut ka daux rahwm rhi tix yuh nan heue. Mawie mai tobrie khankix kix ot sinax aing tix mai ang koe phimap pa koeng pa khei, pa kawx pa vawk, aing krak aing mawie viang seeing brai mie ding kawx, rhawm rhi kawn pwi, kawn nie lheu seeing brai khaing an, mawh kheu nan Siyiex kawn cu ti teei dee ot tix daux kawg mawie, khaing ot ka daux nyiex ot kawn pwi, kheu Nawh cao mawh pa jhak ka daux rhawm rhi plak daux heue.

Phan jhak ka pakpeung plak praix kawn pwi, viang koe pa mhawm grieang mie ding kawx, ka plak daux nawh kied mawh ceu pa seeing pa brai, mai pa kaig pa twa heue. Phan chix ti thawng rieang im ka ju pa im kawn pwi, jah tom yam iak maix, tom hoek yamin, phan chix ti thawng rieang im ka tokaux tix, bawg yam pa im ju maix glang ka singaix pa hoik luan, jah yam iak dix, hoik yuh maix ceu pa kaig mie ceu, hoik yuh maix ceu pa pie lhen mie ceu, tokaux maix hoik tawng heue. pa briex maix ti yuh ceu pa kaik twa maix hoik tawng heue. Pa briex maix ti yuh ceu pa kaik twa mai

ceu pa ang mhawm mhiem kuceu, kied nie mie ding , phan thawng rieang im ka krax im ju kawn pwi daux bawg yam pa hoik luan tix ceu hoik tix ceu, mawh sang pon jhi maix pwi yaox ka rieang thawng maix an lie? Jalao maix sang pon jhi pwi tang kaux yaox, pie tokaux cao maix kawx, teu rien maix ti sidaing kaig twa ka ceu pa hoik yuh tokaux tix mai ang tau ti pon jhak ka rieang pa thawng grawng tokaux tix an heue.

Kawn pwi mawh pa jiet chix yuh grang tokaux tix heue. Viang mawh kawx nan, ka daux rhawm rhi kawn pwi mai ka daux tokaux kawn pwi, naog ka pa kaig mai pa lhat kuceu heue. Mawh kheu jao an, Yesux kawn koe alo ti keh ka daux kawg mawie khaing keh Tix ka daux nyiex kawn pwi heue. Tobrie pa mawh krak, mawie khankix, kix kied seeing brai plak praix, viang mawh nan plak daux kix, nie lheu singax lheu mhawm khaing kawn pwi heue. Mawie mai khawm tobrie khankix ang briex, ang con, ang pie lhen, ang keut pa ang khaw, ang koe rhawm kawx rhawm vawk, ang phit vao mai mex moeng kawn pwi, ang nyaux plai, ang yawt phin, ang tawx mhak ang yuh prai, ang krai lao grawng pa caox pwi mai ang yuh krax lud loe ka pwi tang kaux heue.

Ka piang haktiex dee mawx angah, yam mawx angah, pwi mawx angah, ang koe dee pa mhawm pa singax, ang koe pa rahsee, ang koe pa khaw pa caw heue. Nyiex Haw simiang angah, nyiex vad mai nyiex cao sidiex angah, nyiex pwi koe pingnya mai nyiex pwi pa ao min plak ngai piang haktiex in angah ang koe pa singax pa mhawm, ang koe pa grum pa naog tix dah tix dee kawx heue. Mawh kheu nan, Yesux khrit kawn Siyiex leeingju yaox ka nyiex dee ot kawn pwi mawh dee koe phimap, ang koe pa nhim pa yienyawg heue. Khaix an Yesux keh daux kawg mawie, kheu mawh Nawh Siyiex cao pa viex ceu pa awn pa tiem mai mawh kheu mawh Nawh cao cao pa sang kham geu tang phimap kawn pwi awm tobrie mai kheu mawh Nawh cao pa tan pa lu son kawn pwi haktiex khawmuik, awm pa pah pwi ka tobrie ti kieh mawh pa tan lu son tokaux tix heue. Siyiex kieh Yesu khrit mawh cao pa yuh tang phimap kawn pwi haktiex khawmuik mai mawh pa tan pa lu pa singax pa mhawm, pa pluatploi ka phimap mai pa sighrah ti tik ka phimap haktiex khawmuik khawm leeing heue.

Yam ot tokaux Yesux piang haktiex in dix, Nawh cao cox pwi koe jhawm saux kuceu kieh kix moi, mai ghreu phicao lih khaing pwi pa laig phi khankix mai kieh pwi



saux sipawg khankix singax mai pwi pa hoik yum khankix deeh kieh kix kaoh im khaing krax yum heue. Nawh cao sidiex gau grawng meung raoma mai grawng krax moh Siyiex ka kawn pwi haktiex uik, khaix an Nawh cao yax ti kham geu ti yum ka piang khaoxlhak tang phimap kawn pwi, kawn pwi kied yuh ceu pa caox caig kuceu, mawh kheu jao an, krax kham Yesux ti yum kawx hoik mawh pa yum caox, kheu jao kawn pwi koe phimap pa kied caox caig heue. Viang Yesux yum caox mawh kheu jao pa sidaing caox kawn pwi kawx, daux loe ngaix Nawh cao deeh kaoh im khaing krax yum heue. Pa kaoh im Yesux khaing krax yum an, mawh kheu ting siawp sibrawm Nawh ka piang phimap mai meung yum heue. Nawh cao jhi grawng pa pex Nawh ka krax yum mai meung yum mai mawnarok kawx hoik pex khawmuik heue. Phi caox mai phimap khawmuik hoik koe greem caong Yesux kheu siawp sibrawm Siyiex heue. Nawh mawh cao piang cao, Siyiex piang Siyiex heue.

Yesux kham geu pa yum caox kheu pa caox kawn pwi mai Nawh pex ka pa caox mai meung yum, hoik kieh sidawng grawng mawh Nawh pa pex kuceu kheu pa deeh kaoh im Nawh khaing krax yum heue. Yesux hoik pluat ti tik phimap haktiex khawmuik khawmleeing mai hoik kieh phimap kawn pwi khawmuik laux lak pak leeing ka piang khaoxlhak , krax pa kham yum Yesux mai pa deeh kaoh im Nawh cao an, mawh pa pex ka phimap mai meung yum heue. Mawh kheu Yesux hoik pex ka pa yum mai pa pex ka meung yum, phuk lai sigang hoik kham ti deuh grawng an heue.

**Pa yum eue, pa pex maix koe dee mawx? pa yum eue, nyeeig maix koe dee mawx? Yeeig pa yum mawh phimap mai siawp sibrawm mawh lox lai beenli heue. Yaog yaw bwan son Siyiex pa hoik tawx ex pex, kheu cao Yesux khrit heue. (1 kaw 15:55-57)**

## MAWNAROK MAWH SON PHIMAP

(အပြစ်အတွက်ငဲ့)

Meung kin kha pa mawh meung mawnarok , pwi tix kaux kawx ang nyang sax yaox kah, pwi kukaux krai grawng koe mawnarok, viang mawh nan, pwi tix kaux kawx ang sax yaox ka mawnarok heue. Viang kawn pwi ang sax yaox kawx, pwi khawmuik mai pwi kuceu chix krai grawng koe mawnarok, mawh kheu khwan pa koe ka daux kawn pwi, kieh kawn pwi tawng ka daux rhawm khwan tix heue. Ceu pa ang kawn pwi chix yaox , phan rug tawng nawh koe tete, pa kieh pwi tawng grawng an, hoik mawh khwan pa koe ka daux rhawm rhi kawn pwi , pa kieh chix tawng ka grawng an heue. Pa nie lheu mawh pa rug, mawh phuk lai Siyiex pa singax pa ang chix koe pa pie pa lhen, pa hoik kieh sidawng tawng ka grawng an heue.

- Mawnarok mawh dee kham geu pa kin kha, mawh kheu jao phimap heue. Mawh kheu nan, lai sigang Siyiex pa singax hoik krai grawng an mawh dee ciyang mawnarok heue. (Mathiex 23:33)
- Pwi pa ang doh keut ka phimap tix, pa ang tik vud ka ceu pa caox caig pa yuh tix, pa ang yum rhawm ka krax moh Siyiex mai krax taoh Yesux khrit , kix hoik lih mawh kawn meung mawnarok heue. (Mathiex 23:15)

- Mawnarok pa ah nan, mawh dee gleeing ngu leeingju leeingphan pa ang chix yeet tix bawg kawx heue. (mathiex 25:41)
- Ka daux glauh ngu an, koe pa yiem riak yiem yo mai pa greeik rhang, mai pa faik ku jheengjheeng heue. mawh dee kha rhawm kha rhi tix ang jud jai heue. (mathiex 25:30)
- Ka daux meung kin kha mawnarok an, ang ngu chix yeet mai ang viag kawng chix yum , phan viag kawng pa koe ceex ngie ang chix yum, jung pwi pa ting riang rao ding dot sang chix yum yuh ka mawx? An mawh pa kok mawh mawnarok meung kinkha heue. (Makux 9:44)
- Mawnarok mawh dee gleeing ngu pa mawh dung ngu mhat, pa ang mawh ngu giexgiex, pa gleeing pa hax ang uik ang leeing heue. (Plak 20:20)
- Ngu pa gleeing ka daux meung mawnarok an, ang mawh tivud ticu, mawh leeingju leeingphan heue. (Mathiex 25:42)

Mawnarok ang mawh pa yuh Siyiex son kawn pwi, kawn pwi mawh pa phan pa yuh Siyiex mai mawh kawn Siyiex, mawh kheu nan, Siyiex ang chix tawx krax ciyang ka kawn pwi, Siyiex mawh krax moh krax rhawm mai grum naog mai krax caux rhawm pa mhawm heue. Keeing cao ang koe pa koeng, koe pa rahsee mai ceu pa mhawm pa singax singeh ngie khaing heue. Siyiex yuh mawnarok sonsang prawng ciyang ka phimap mai ka kawn cau raoma pa caox, pa tuktiak ka alo Siyiex , pa jah ti kieh phimap lih koe ka piang haktiex in, pa ting rhawm lhaong ngai mai pa sang yuh ti awm Siyiex heue. Phuk lai sigang pa singax, tiem ti deuh grawng an awm pa koe plak greem tin heue.

**Kawn cau Siyiex khankix pa ang priex ti hawt yuh ceu pa kieh kix yuh phaoka , viang mawh kawx nan pa hoik tik ghram glawk dee khaw ti ot, Nawh hoik laung ka ceng leeingju, ka daux pa faik, tom hoek bawg yam sang prawng ca, singaix pa ting lhaong an heue. (Yudax 1:6)**

Mawnarok mawh dee sang laung ka Satan phicao yam sidah bawg yam cie kix tix singaix sax heue. Gum lox phuk lai sigang krai ti deuh grawng an ahnin,

**Nawh giex ka siyawng an pa mawh siuing prim dix, pa mawh phicaux mai satan mai phyawk nawh son been tix rheng num mai taing nawh sau ka daux pa ang koe dee die an mai nyeeep ka moing daux an mai tawk cum ka piang moing**

**daux nawh, yuh ka mawx son ang nawh lai baox pie ka ceu pwi khankix khaix, tom hoek sidah tix rheng num heue. (Plak 20:2-3)**

**Khaix hoik laung Siyiex ka Satan been tix rheng num, deeh ploi tivud khaix heue. (Plak 20:3)**

## **PA JHAX LAWG MAI BWAN SON**

(တၢ်နီၤခြံင်း အမၤလာ် န့ၣ် တၢ်ကောင်းတြီၢ်မၤလာ်)

Ka daux lai yam jah simin ting tix simin iak tix tom sidah, krai ti deuh grawh grawng pa phan yuh Siyiex ka can ceu pa koe kuceu khawmuik, pa chix yaox pa ang chix yaox kuceu kucawng heue. Siyiex hoik yuh kuceu ka daux krax moh Nawh mai ka daux siawp sibrawm Nawh cao pa ting pa lhaong pa daox pa am heue.

Pa phan pa yuh Siyiex daux bawg yam jah dix, mawh pa mhawm grang, mawh pa koe bwanson, mawh pa koe ngawh jum, mawh pa singax mai mawh pa grum naog mai grum mhawm khawmuik heue. Can pa hoik phan Siyiex ti deuh an khankix, tix mu mai tix mu, tix ceu mai tix ceu, ang koe pa tuktiak ka paox tix, mai kix khaw caw ka paox tix khawmuik, mai kuceu khawmuik mawh pa jiet mhawm mai pa jiet nyawm ti jhak heue. Yam hoik phan hoik yuh Siyiex ka can kuceu kucawng, Nawh cao yaox pa kied mhawm mai koe krax khaw rhawm ka daux rhawm rhi Siyiex heue.

**Siyiex yaox ka can pa yuh tix kuceu, ceu an khankix mawh pa kied mhawm, koe pon bo mai pon ngawb, an mawh singaix liah heue. (Yam 1:31)**

Siyiex tawm lox ka Adam mai Evax, ang cu kiex ih plix khaox pa tawng ka pa mhawm mai pa ang mhawm, phan pax ih plix khaox an, singaix an pax tak yum ahnan ka kiex, tiebtie ka kiex son ang kiex sang ih ka plix khaox an heue. Yam an phicaox cao nyaw laig daux siuing hoek ti nyaw glaw ka Adam mai Evax, mai kiex nghiet lox

nyaw glaw phicaoX mai man ti teei ih ka plix khaox an heue. Jah ka dauX bawg yam an, can khaix taix roi caong Siyiex pa jiet mhawm pa koe ngawh koe jum mai pa grum naog an khankix lih ti mawh pa caox, pa ang leut ang khaw mai can ceu pa koe bwanson an ku ceu, lih ti mawh pa jhax lawg pa kharhawm kharhi heue. Can kuceu hoik tuktiak tute ka paox tix, ang lai khaw caw paox tix tom sidah dauX bawg yam singaix in heue. Khaix an Siyiex jhax lawg ka siuing angah ka Adam mai E vax angah, awm gumlox Siyiex pa tiem ti deuh plak greem tin heue.

**Siyiex ah nin ka siuing , mawh kheu hoik yuh maix ceu in, maix tak pon pa jhax lawg khaing tobrie pa meed pa blich khankix khawmuik mai maix tak mu ka vaig tix mai ih phawng tiex tom sidah ju tix. Aux tak kieh pwi koeng koe sinax maix mai pwi sibon doeh ru maix mai doeh ru sibon, nawh tak dig kaing maix mai maix kieh loek caong nawh mat heue. (Yam 3:14-15)**

Khaix hoik jhax lawg Siyiex ka siuing, Nawh cao baoX jhax lawg ka bon ah nin,

**Aux tak sang blon tawX krax pa kha rhawm ka maix ka dauX pa keh maix kawm tix , mai tak hawt alo mex tix mai nawh tak kwang ka piang maix heue. (Yam 3:16)**

**Khaix an Nawh cao ahnin ka pwi simex, mawh kheu nghiet mai ka lox moeng tix mai maix ih plix khaox pa tieb aux maix ang ih, haktiex tak mawh pa jhaxlawg kheu maix, maix tak yaoX ti ih khaing nawh ka dauX pa kharhawm tix, tom sidah ju tix heue. Katlawm mai pang kat khankix tak lih koe son maix, maix tak ih tauX lhax khaing haktiex, maix tak lih rawm lauh, sonsaug pon maix ti ih priex mai deeh ing ka phawng tiex heue. Grawhgrawng nawh maix hoik mawh pa yuh Aux khaing phawng tiex mai tak deeh ing ka phawng tiex heue. (Yam 3:17-19)**

Mawh kheu kawm pwi hoik phit hoik lud plak sivoe ngai Siyiex. mai hoik pon ceu pa jhax pa lawg kheu krax pa lud loe tix heue. Viang mawh kawX nan Siyiex mawh cao pa grum naog mai krax moh krax rhawm, Nawh cao caux rhawm ka kawm pwi mai deeh cox kieh pa jhaxlawg mawh bwanson heue. Bwanson an mawh pa tawX Siyiex, kawm cao Yesux khrit hoek ti mawh cao taoH, kham geu ti yum, tang phimap kawm pwi piang haktiex, mawh kheu bwanson an, ceu pa jhax lawg kheu phimap, hoik lih ti mawh bwanson, kheu krax caux rhawm mai krax moh Siyiex heue. Phuk lai sigang baoX tiem ti deuh ah nin.

Cao khrit hoik taoh ex khaing daux pa jhaxlawg lox lai beenli, kheu hoik mawh Nawh pa jhaxlawg son ex, grawgrawng nawh hoik tiem ti deuh ahnin, pa preue ka piang khaox kukaux daux pwi, mawh pa jhax lawg heue.

Yesux khrit mawh pwi Yudax, tei nexnham pwi, lih keh ka daux ceu pwi Yudax heue. Viang mawh nan ceu pwi Yudax ang rieb ka Nawh, lheu khaing an, kix kawm jawm mai kawm jiang ti sawg ka krax lud Nawh mai jawm ti pah ka Nawh cao ku ngaix ku sawm heue. Sidah khaix kix yo lox ti ah ka Yesux, pah ka nawh, tawk Nawh ka piang khaoxlhak, tawk Nawh ka piang khaoxlhak ahnan heue. Mawh kheu kix ca niied ti baoh yo lox an ku singaix, simiang cao giex kaing veng, sawg ti cied yaox ka phimap krax lud Yesux, viang mawh kawx nan nawh ang yaox phimap Nawh cao, mawh kheu nan, nawh tom tei rawm mai khoeok taix tix sivoe ngai pwi haoh pwi hun, mai nawh ahnin, aux ang dexdawd mai nham pwi rahsee in, aux ang yaox ka krax phit lud Nawh, Yam an pwi haoh pwi hun niied ti yo lox sinum ahnin, tawk Nawh yum piang khaoxlhak, tawk Nawh yum piang khaoxlhak, kieh nham Nawh hoek ka piang yix mai ka piang ju kawm praix yix, kix ahnan, mai kix jhaxlawg ka tokaux tix heue. Phuk lai sigang baoh krai grawng an ahnin,

**Yam tawng Pilat ka tokaux tix ang chix yuh tittix , mai yaox pwi dex simah ka paoh tix, Nawh tei rawm mai khoeok taix tix sivoe pwi hun khankix, mai nawh ah nin, aux ang koe dee lud, aux luan khaing nham pa rahsee in. pex jhak grawh grawng in heue. Pwi khawmuik pawk lox ah nin, kieh nham koe piang ex mai kawm praix ex heue. (Mathiex 27:24-25)**

Pwi yudax khankix, kix hoik pon pa jhaxlawg (2) ceu, pa jhaxlawg Siyiex ka Adam Evax mai pa jhaxlawg ka ceu pwi Yudax grawng thieang kix ti tik ka Yusux khrit heue. Kheu ceu pwi yudax khankix, hoik pon pa jhaxlawg grawng nham Yesux pa singax singeh, pa ang koe dee phit lud, phimap pa jhaxlawg an hoek ka piang kix mai ka piang ju kawm praix tom sidah tix ju hoik tix ju heue.

Jah Num pa hoik luan ra rheng num bawg yam khaix an dix, ceu pwi yudax khankix sidaing pon kix krax kham geu kuceu kheu krax jhax krax lawg, kix yaox ti yuh siliex pwi tang ceu, mai kix Yaox ti kham geu krax pa tuktiak tute pwi mai krax pa gut pa kheem pwi, ka daux pa yuh nan, kix yaox ti som ju ka daux taix pwi tang ceu mai yum kaing: shien kaing lan kaux , kix yaox ti kham ceu pa kham geu pa nu pa cien kuceu heue. Ka daux bawg yam ra rheng num in, viang kix yaox ti kham geu mie ding angah, ang nyang koe pa khirhawm ka son grawng an, pa nie ting ceu, mawh pa

sang yaox kix ti kham geu krax kha rhawm leeingju pa ang lai chix uik chix leeing heue. Daux phuk lai baox tiem ti deuh ah nin,

**Mawh kheu nan krax song rhawm Siyiex hoik yaog ti lih ka daux haktiex in, mai Siyiex kieh pa jhaxlawg kuceu pa hoik tiem ti deuh daux phuk lai in lih hoek kapiang haktiex ankix, Siyiex hoik kieh reeig ti tik kix khaing daux haktiex kix, daux pa song rhawm mai daux pa meet rhawm tix, ka daux pa kied song rhawm, mai teei ti tik kix ka daux haktiex tang dah, awm pa koe daux in singaix. (Sidiex 29:27-28)**

Ceu pwi Yudax khankix, kix ang rieb ka Yesux mai kix ang yum rhawm ka Nawh cao, mawh kheu nan jah tom ju yam an dix tom hu tix ju hoik tix ju, kix pon pa jhax pa lawg mai kawn praix kix pon pa kharhawm kheu sinngao pa caox pa brai pa ang koe bwan pa deuh ju tax yiex miex keeing kix ka son ju kawn praix tix heue. Yesux mawh kawn Siyiex pa hoek khaing raoma lih hoek piang haktiex, sonsang kieh pa jhax lawg an lih mawh pa koe bwanson heue. Can pwi pa rieb ti teei yum rhawm ka Yesux mai krub ka Nawh cao khaing , nawh tak lawdluan khaing pa jhaxlawg mai tak pon bwanson pa tawx Siyiex, pa mawh pa nhim mai ju leeingju heue. Yesux hoek sonsang pon pwi khawmuik ti lawd luan khaing pa jhax pa lawg mai pa pon bwanson son ju in mai son ju khaix, pa mawh ju leeingju leeingphan heue.

Yesux mawh cao pa tieh ka pa jhax lawg deeh kieh mawh bwanson, can pwi pa yum rhawm ka Yesux mai pa appong ju khwan tix khawmuik ka daux Nawh cao, Siyiex tak kieh dud maox pa phyawk pa gang: ka ju nawh, pa mawh maox pa jhaxlawg mai ang lai kieh koe pa jhaxlawg pa phyawk ka khwan ju nawh , tom deeh tieh ti kieh lih mawh bwanson heue. Pa yuh nan mawh krax moh Siyiex mai mawh bwanson siawp sibrawm pa ting pa lhaong Nawh cao heue. Pa chix kieh pa jhaxlawg grai luan hu paklawg, mawh Yesux tix kaux ngie khaing heue.

Daux ju kawn pwi piang haktiex in, pa ting ceu khaing paox tix tix ceu, mawh pa bhoek pa luan khaing pa jhaxlawg heue. Grawh grawng nawh, ceu an, mawh pa deuh ka simie krax kharhawm leeingju son kawn praix tix, tix baux ju hoik tix baux ju heue. Phan maix ang pat maox nawh dud daux ju maix yamin, maix mawh pa deuh simie pa seeing pa brai koe ka daux ju kawn tix, viang maix deuh sinngao pa mawh kraung khrai mau khri mie ding kawx ang koe bwanson, kheu pa jhaxlawg an ang chix grai chix laux kheu mau khri, mawh pa chix laux chix grai ka daux krax yum rhawm

ka Yesux tix ceu ngie khaing heue. Khaix hoik yum rhawm maix ka Yesux, maix tak pon tawng ka grawng tokaux tix ang lai ot ka daux pa jhaxlawg , mai can pwi pa dexdawd mai maix khankix, tak sawg ti tawng grawng pa hoik luan maix khaing pa jhaxlawg yuh ka mawx? viang kix kawx tak yax daux krax lawdluan kheu bwanson Siyiex mai kheu maix pa thong pa jhi daux krax ka kix heue.

Siyiex deuh pa jhaxlawg mai bwanson sivoie can kawn pwi piang haktiex khawmuik, mai kieh kawn pwi laug ti cie, mawh kheu nan Siyiex tom tawx bawg yam krax im ju ka kawn pwi sonsang pon laug ka bwanson Nawh heue. Ceu pa ah nan, mawh alo Siyiex mai mawh krax moh Siyiex ka kawn pwi khawmuik, mai tawx akhwang pa ting sonsang pon luan pwi kukaux khaing pa jhaxlawg mai sonsang pon pwi kukaux bwanson krax caux rhawm Siyiex pa kaux pa koe leeingju heue.

**Jhak heue Aux deuh krax pa nawb bwanson mai krax pa jhaxlawg ka plak sivoie pex daux in singaix , phan pex cu nghied ka lox pingnyap Siyiex leeingju, mai phan pex veeh tix hu khaing daux krax pa hoik tawm Aux ka pex daux singaix , phan hawt khaix Siyiex tang kaux pa ang pex nyang sax tawng khankix, pex tak pon krax pa jhaxlawg. (Pingnyap 11:26-28)**

Siyiex cao pa mhawm pa mawh cao pa kieh pwi phimap bhoek luan khaing pa jhaxlawg mai pa kieh pwi kukaux pon bwanson, hoik cox ti deuh daux krax ka son kawn pwi uik heue. Can pwi pa lawng daux krax an, tak bhoek luan khaing pa jhaxlawg leeingju mai tak pon bawson krax moh mai krax caux rhawm pa tawx Siyiex leeingju heue.

**Mawh kheu moh Nawh ka maix mai kieh pa jhax lawg lih mawh bwanson ka daux maix heue. (Pingnyap 23:5)**

Pa jhaxlawg Siyiex ka daux ju Adam mai Evax dix, lih ti mawh pa kha rhawm pa saux pa yum, dee sidah khaix, mawh pa viex hu ka daux dee ciyang ka phimap dee kham geu krax pa kinkha leeingju leeingphan daux meung yum, dee kha rhawm ang jud ang jai daux mawnarok heue. viang mawh kawx nan, Siyiex pa ting mai Siawp sibrawm tau mai krax moh krax rhawm, pa kied mhawm ka piang kuceu khawmuik an, tawx kawn tix Yesux mawh cao pa kham geu tang phimap kawn pwi khawmuik, Nawh cao kham pa jhaxlaug an ka son ex, mai pa jhaxlawg an hoek ka piang Yesux khawmuik khawmleeing heue.



Yesux mawh cao kham pa jhaxlawg son kawn pwi, mawh kheu pa jhaxlawg an hoik hoek ka piang Yesux, krax taoh Yesux mai ju pa im leeingju cie Nawh deeh hoek ka daux pwi pa yum rhawm ka Nawh khawmuik, kheu bwanson krax caux rhawm Siyiex mai kheu krax yum rhawm ka pa hoik kham Yesux krax pa jhaxlawg son tang kawn pwi phimap khawmuik heue.

**Cao khrit hoik taoh ex khaing pa jhaxlawg lox lai beenli, kheu hoik mawh Nawh pa jhaxlawg son ex, grawhgrawng nawh hoik tiem ti deuh ahnin, pa preue ka piang khaox kukaux dauxpwi , mawh pa jhaxlawg heue. (Kalatix 3:13)**

## CAO PA PEX KA MAW NAROK

(ငရဲ တို့အောင်မြင်သူ)

Siyiex piang Siyiex cao piang cao, pa mawh cao pa jah mai pa ghoik khaix, cao phan cao yuh, cao taoh cao teem pa mawh Siyiex pa grum naog mai siawp sibrawm tau mai min plak ngai, Siyiex pa grum naog mai siawp sibrawm piang ku ceu khaw muik mawh Siyiex pa im ju, pa kok mawh Siyiex leeingju leeingphan tix kaux ngie khaing heue.

Kawn pwi piang haktiex in khawmuik khawmleeing hoik lih mawh kawn phimap, kheu pa thieang Adam Evax ka lox tawm: jhawm Siyiex leeingju heue. Awm pa koe lox tawm Siyiex ka Adam mai Evax, phan pax ih plix khaox in yam mawx pax tak yum tete, Siyiex leeingju ang chix pie lhen, yuh awm lox tawm: tix, kheu mawh Nawh Siyiex pa rahsee pa singax singeh heue. Mawh kheu jao an, jah ka Adam mai Evax, can kawn pwi pa koe khawmuik, yaox ti mawh kawn phimap mai yaox ti hu ka daux meung yum pa kok mawh meung mawnarok heue.

Siyiex leeingju mawh cao pa grum naog mai krax moh mai krax caux rhawm, Nawh cao moh ka kawn pwi mai koeng ka phimap, mai Nawh ang doh ghrum kawn pwi laux lak pak leeing daux phimap mai meung mawnarok, mawh kheu nan, Nawh ploi Yesux khrit cao taoh hoek ka piang haktiex in, mai kham geu ti yum tang phimap kawn pwi ka piang haktiex khawmuik, khaix hoik sipaung Nawh daux loe singaix, Nawh deeh kaoh im khaing daux krax yum heue. Pa kaoh im Yesux khaing daux krax yum an, mawh pa pex Nawh ka krax yum mai meung yum mai mawh pa pex Nawh cao ka mawnarok heue.

Siyiex pa krub pwi piang haktiex kuceu, pa ang tie rug mawh Siyiex tete, ang sax kaoh im khaing krax yum mai ang sax pex ka krax yum pie tix kaux kawx, ang sax pon mhong grawng cao pa kaoh im khaing krax yum mai cao pa pex ka meung yum ka piang haktiex in, lheu khaing Yesux tix kaux ngie khaing heue. Been li patix angah, krax krub ceu pwi mawx angah pa krai grawng pa deeh kaoh im khaing krax yum, mai pa krai grawng pa pon taoh khaing meung mawnarok, ang koe tix bawg kawx, ang koe tix ceu kawx pon ang sax koe tete heue. Pa pex krax yum mai pa pon taoh pwi khaing meung mawnarok mawh ngie Yesux tix kaux khaing heue. Pa yum mai pa deeh kaoh im, pa haok ka daux meung raoma awm Yesux ang koe tix kaux kawx, Siyiex pa pon taoh kawn pwi khaing daux phimap, Siyiex pa tawx ju leeingju ka kawn pwi, Siyiex pa prawng ca ka kawn pwi mai ka can pa koe kuceu kucawng khawmuik khawmleeing ang sax koe, lheu khaing Yesux tix kaux khaing heue.

Yesux mawh cao ju mai pa im ju heue. Kheu mawh Nawh cao ju, Nawh tom chix tawx ju ka kawn pwi heue. Phan Nawh ang koe ju, Nawh sang chix tawx ju ka pwi tang kaux yuh ka mawx? Phan maix ang koe rawm maix sang chix tawx pwi tang kaux nyaux rawm yuh ka mawx? phan koe rawm tom chix tawx pwi tang kaux nyawm ang mawh lie? Awm an phan mawh siyiex pa koe piang haktiex pa ang tie rug mawh siyiex tete telai an, kheu kix ang koe ju, kix ang chi taoh ju pwi, Yesux mawh Siyiex pa im ju mai mawh Siyiex cao pa tawx ju pa im ka kawn pwi, grawh grawng nawh, kheu hoik pex Nawh cao ka meung yum mai mawnarok heue. Mawh kheu nan lox grawng pa pex Yesux ka krax yum mai meung yum an, hoik pao ti kieh luah kieh sidawng lhainglhaing, sonsang mhong sang tawng can kawn pwi khawmuik

khawmleeing khawmmu khawmmiang ka krax pa hoik pex Yesux ka meung yum mai mawnarok heue.

Lox pa hoik pao son pwi piang haktiex grawng pa hoik pex Yesux ka meung mawnarok mai pa koe siawp sibrawm pa ting pa lhaong Nawh cao ka piang kuceu kucawng khawmuik khawmleeing an, mawh lox pa ang siyiex pa ang rug mawh Siyiex tete chix koe akhwang ti ah ti krai , mawh lox pa koe akhwang Yesux tix kaux ngie khaing ti krai, mawh kheu lox pa koe siawp sibrawm an, mawh lox pa koe ka daux Yesux tix kaux ngie khaing, Nawh tom chix pon pao ti kieh pwi haktiex khawmuik mhong kah heue. Lox pao grawng mawh Yesux cao pa pex meung Yum mai mawnarok an mawh lox pa luah pa sinum pa hoik ah nin,

**Pa yum eue, pa pex maix koe dee mawx? pa yum eue, nyeeing maix koe dee mawx? nyeeig pa yum mawh phimap mai sibrawm phimap mawh lox lai beenli heue. Yaog yaw bwan son Siyiex pa hoik tawx ex pex kheu cao ex pa mawh Yesux khrit heue. (1 kawrin thux 15:56-57)**

Siyiex cao Pa Pex mawh Yesux tix kaux khaing.

1. Siyiex cao phan cao yuh ka kuceu ku cawng khawmuik khawm leeing pa mawh pa chix yaox pa ang chi yaox khawmmu khawmmiang an, chix ti kok mawh Siyiex cao pa pex heue.
2. Siyiex pa im ju ku ju leeingju leeingphan pa ang chix tieh chix loh pa koe kawx kawx mai singaix mai leeing ju, ang chi bheet chix laix, ang chix grai chix ghrup an mawh Siyiex cao pa pex heue.
3. Siyiex pa pon taoh pwi khaing phimap mai mawnarok , Siyiex pa ting siawp sibrawm ka piang phimap mai phicao satan, Siyiex pa pon pluat ploi phimap kawn pwi, Siyiex pa grum naog mai krax moh krax rhawm mai krax caux rhawm pa kied ting mawh Siyiex pa pex heue.
4. Siyiex pa deeh kaoh im khaing krax yum mai pa tawx ju pa im ka kawn pwi, pa mawh cao ju cao khwan mai cao pa prawng ca ka piang kuceu mawh Siyiex cao pa pex heue.
5. Siyiex pa giex pa kwang ka kuceu khawmuik, cao pa pex ka kuceu khawmuik, cao pa ting ka piang kuceu khawmuik an mawh Siyiex cao pa pex pa mawh Yesux Khrit tix kaux ngie khaing heue.

Phan pwi kieh maix laug ti cie lawli pa kaoh khaing haktiex (Japan) haktiex Hawx Rawm, lawli pa jiet mhawm lawli pa sidaing kaux sidaing mhawm grang, pa ang tawx ngawh jum, pa pon yie pa mawh totaix (laksawng) pa tawx cao mi pwi koe tix kaux kaux, maix teu rien ti laug ka pa nie lheu mhawm, pa nie lheu grang, pa nie lheu kaux khaing paox tix ang mawh lie? Keut daux rhawm tix mhawm mhawm yaox, pwi mawx angah phan ang mawh pwi yhot mai pwi aw, teu laug ti cie ka pa nie mhawm khaing paox tix heue.

Awm an, son ju tokaux tix mai son kawn nyiex ma tix, son ju in mai son ju khaix, phan maix sawg ka Siyiex pa nie lheu mhawm, khaing Siyiex tang ceu mai sang pon yaox ka Siyiex pa yuh ka mawx lheu khaing Yesux lie? Maix ang khaw ti laug ka Siyiex pa nie lheu mhawm khaing paox tix pa mawh Yesux cao pa pex kuceu kuceu khawmuik lie? Rug mawh tete, rug caw tete, Yesux mawh Siyiex cao pa pex ka krax yum mai mawnarok heue. mawh Siyiex pa koe tix kaux ngie khaing ka son khawmuik heue.

## PA KEH RA CEU MAI PA YUM RA CEU

(မေ့ခြင်းနှစ်မျိုး နှင့် သေခြင်းနှစ်မျိုး)

Siyiex leeingju teei phawng tiex mai phan yuh ka kawn pwi mai phlu bhawm pa im ka daux meeh nawh pa mawh (khwan), Khaix an kawn pwi lih ti mawh jung pwi pa im ju heue. (Yam jah 2:7)

Yam phan yuh Siyiex ka kawn pwi, phan ti kieh koe tokaux, rhawmrhi, jukhwan tom lih mawh kawn pwi pa grum naog pa mhawm heue; tokaux mai rhawm rhi mawh pa koe tivud ngie, phan mawh khwan mawh pa koe leeingju leeingphan heue. leeingju pa ah nan koe ra ceu, dee pa kharhawm leeingju mai dee pa im ju leeingju heue. Daux phuk lai sigang hoik kra ti deuh ahnin.

**Kix tak sang hu laig ka daux pa ciyang leeingju heue. viang mawh nan pa rah see khankix, tak sang laig ka ju pa im leeingju heue. (Mathiex 25:45)**

Can pwi pa mhong gumlox bwan gauxrhawm gauxrhi pa mawh grawng krax taoh Yesux ka pwi phimap khaing daux mawnarok, phan nawh yum rhawm ka Yesux mai phan nawh tik vud ka can krax pa lud loe tix khankix mai phan nawh rieb ti teei ka Yesux khrit mawh cao taoh ka daux rhawm rhi khwan ju tix, khwan ju nawh tak pon laig ka daux pa im ju leeingju heue. Phan mawh khwan ju pa ang rieb ti yum rhawm ka Yesux khrit, tak sang laig ka daux ju pa kha rhawm leeingju pa mawh

meung mawnarok heue. mawh kheu nan, krax pa keh ra bawg mai krax pa yum ra bawg tom lih koe son kawn pwi piang haktiex in heue.

Keh plak tokaux nexnham pa mawh pa keh khaing kawn pwi pa mawh pa keh khaing bon, mawh pa keh bawg tix, pa keh bawg tix an mawh khaing phimap mai mawh daux phimap, mai mawh pa laig daux mawnarok kheu phimap heue. viang mawh nan pa keh ra bawg tix bawg ang lai mawh pa keh khaing kawn pwi, mawh pa keh daux gumlox Siyiex mai pa keh daux khwan cao, mai pa rieb ti mawh kawn Siyiex pa im leeingju leeingphan heue.

Krax yum ra ceu pa ah nan mawh awm pa hoik krai grawng krax keh ra ceu awm pa hoik koe plak piang heue. Yum bawg tix mawh pa yum tokaux pa mawh pa lih hu tokaux pwi khaing haktiex in heue. Tokaux nawh ang lai ot piang haktiex, viang mawh nan khwan ju nawh ang grai mai yaox ti laig ka daux meung yum leeing ju pa mawh meung mawnarok heue. an mawh pa yum ra bawg tix bawg heue. Viang nawh hoik yum tokaux ka piang haktiex in, ju nawh ang yum ka piang haktiex, tak kawn baox yaox ti sipub krax yum khwan ka daux meung pa kok mawh meung kinkha meung mawnarok heue.

Teei ti taing sau pa yum mai meung yum ka daux nhawng ngu heue. In mawh pa yum ra bawg tix bawg pa mawh pa laig ka daux nhawng ngu heue. (Plak jhi 20:14)

### **KEH BAWG TIX MAI KEH BAWG RA**

(ဝထမ မွေးခြင်းနှင့် ဒုတိယမွေးခြင်း)

Krax keh koe ra ceu pa mawh krax pa keh plak tokaux nexnham, mai krax pa keh plak khwan heue. Krax pa keh plak to kaux nex nham mawh pa keh pwi khaing bon, pa keh khaing daux vaig miex tix heue. Pa keh khaing vaig miex tix mawh pa viex phimap hoek mai pa keh ka daux phimap heue. Mawh kheu viex nawh phimap hoek mai kheu keh nawh ka daux phimap, nawh tak sang saux mai tak sang yum mai tak sang hu laig ka daux mawnarok mawh kheu jao viex nawh phimap hoek, mai nawh caw ti hu tawx ngawh riang phimap tix ka daux meung dee kinkha meung mawnarok heue.

Krax keh plak khwan kienieh ang lai awm an, krax keh plak khwan mawh pa keh kheu Siyiex mai kheu gumlox Siyiex pa im ju, pa mawh gumlox krax taoh heue. Mawh pa keh nawh daux khwan singax singeh mai pa im ju leeingju leeingphan heue. Pa keh daux khwan an, mawh pa mhong gumlox Siyiex pa mawh lox grawng krax taoh, khaix hoik mhong lox bwan an, pa mawh grawng krax moh Siyiex ka kawn pwi

phimap mai phan nawh rieb ti yum rhawm ka gumlox bwan grawng krax taoh an, khwan singax singeh laig ot ka dauh nawh mai tawk cum, grawng pa lih mawh nawh kawn Siyiex heue. Yam an mawh yam keh nawh ka dauh khwan heue. Pa keh dauh khwan mawh pa rieb ti cie ka pa mawh meh pa mawh gumlox Siyiex pa im ju mai mawh pa yum rhawm ka Yesux cao taoh heue. Pa keh ka dauh khwan, mawh pa thiang ti tik ka alo tokaux mai alo phicaox mai pa rieb ti teei alo Siyiex pa mawh krax taoh heue. Pa keh dauh khwan ang lai dexdawd mai phimap, ang lai dexdawd mai meung yum, ang lai dexdawd mai phicaox, ang lai dexdawd mai mawnarok, mawh pa dex dawd mai Siyiex pa lih ti mawh kawn Siyiex heue. Mawh pa tawng tokaux tix mawh kawn phimap mai pa yum rhawm ka pa mawh meh, ceu pa yuh Yesux ti tawx krax taoh ka kawn pwi phimap, mai pa yum rhawm ka Yesux pa kham ti yum tang phimap mai pa deeh kaoh im khaing krax yum kheu krax moh Siyiex heue.

**Yesux baoh deeh pawk lox ah nin, Aux kraih lox tete ka maix, phan pwi ang keh dauh rawm mai khwan, nawh ang pon ti laig ka dauh meung Siyiex, pa keh khaing nex mawh nex mai pa keh khaing khwan mawh khwan heue. (Yohan 3:5-6)**

Pa keh tix bawg ngie tak yum ra bawg, yum tokaux tix bawg mai yum khwan tix bawg heue. viang mawh nan phan mawh pa keh ra bawg tak yum tix bawg ngie, mawh tokaux nawh pa yum, khwan nawh im ju leeingju leeingphan tau mai Siyiex dauh meung raoma heue. Pa keh tix bawg, mawh khaing phimap - hu dauh meung mawnarok leeingju, mai pa keh dauh khwan mawh dauh Siyiex mai dauh khwan, hu dauh meung Siyiex heue. Nawh hoik lih mawh kawn Siyiex mai pon sin meung Siyiex mai im ju tau mai Siyiex leeingju heue.

Can pwi pa rieb ti yum rhawm ka ceu kaux Nawh cao khankix, Nawh cao tawx akhwang ti kieh nawh mawh kawn Siyiex heue. Kaw an keh kheu pwi ang mawh, kheu alo nexnham ang mawh, kheu alo kawn pwi ang mawh, mawh kawn pa keh khaing Siyiex heue. (Yohan 1:12-13)

## **YUM BAWG TIX MAI YUM BAWG RA**

(ပထမသေခြင်းနှင့် ဒုတိယသေခြင်း)

Yum koe ra bawg ra ceu heue. Yum ra bawg ra ceu an mawh pa yum bawg tix mai pa yum bawg ra heue. Pa yum bawg tix mawh yum tokaux nexnham mai pa yum bawg ra mawh pa yum ju mai laig daux dee kinkha pa kok mawh meung Mawnarok pa kha rhawm leeingju leeingphan heue. Pa yum tokaux mawh pa laux pa Yum tokaux laig daux tiex mai hoek ka daux pa cux sium heue. tokaux an cux sium ka daux tiex mai rham mai grai hu khaix heue. viang mawh kawx nan, kheu mawh jung pwi pa phan yuh ka phawng tiex mai pa phlu Siyiex bhawm pa im ju pa mawh khwan ka daux nawh, viang tokaux chi yum mai chix cux sium ka daux tiex kawx, khwan ju nawh pa hoik phlu Siyiex ti tawx an, ang chix laux chix grai ka daux tiex, mawh pa koe leeingju leeingphan heue. Mawh kheu koe leeingju ra mu leeingju tix mu, mawh pa im gaux rhawm leeingju , mai leeing ju ra mu tix mu, mawh pa kha rhawm dee ciyang phimap leeingju leeingphan heue. (Mathiex 25:46)

Can pwi pa yum rhawm ka Yesux mai krub ka Nawh Cao tix kaux ngie khaing, viang to kaux nexnham nawh cux sium mai laux grai hu kawx, khwan ju nawh ang lai chix laux chix grai, tak sang laig ka daux meung Siyiex mai tak im ju ka daux siawp sibrawm min plak ngai Siyiex leeingju leeingphan heue. Can pwi pa ang yum rhawm ka Yesux khrit kukaux daux pwi, mawh kheu nawh ang yum rhawm ka kawn Siyiex pa koe tix kaux khaing , krax yum bawg ra pa mawh krax yum khwan mai krax prawng krax ciyang phimap, hoek ka piang nawh mai tak yaox ti kham geu pa kinkha daux meung yum leeingju leeingphan, kheu phuk lai sigang hoik sidawng kra ti deuh kriem kre heue. (Yohan 3:16-18). Lheu khaix an daux phuk lai sigang baux tiem ti deuh ah nin,

**Tei ti taing sau pa yum mai meung yum ka daux nhawng ngu heue. an mawh pa yum ra bawg tix bawg heue. Viang can pwi pa ang laig carang ceu kaux ka daux phuk lai pa im ju an, tei ti taing sau nawh ka daux nhawng ngu an heue. (Plak jh 20:14-15)**

Can pwi pa keh tix bawg, pa keh khaing vaig miex tix mai ot ka daux phimap khankix, tak yaox ti yum ra bawg, can pwi pa hoik keh khaing tokaux nexnham pa mawh pa keh bawg tix an, phan nawh yum rhawm ka gum lox Siyiex mai rieb ti tei ka Yesux mawh cao taoh daux ju tix, kheu baux keh nawh ra bawg tix bawg ka daux khwan cao, nawh ang lai koe krax yum ra bawg, pa mawh krax yum daux khwan, mawh kheu nan, pa keh tix bawg yum ra bawg, pa keh ra bawg yum ngie tix bawg ngie khaing heue. Grawhgrawng nawh phan nawh hoik keh khaing vaig miex ti, kheu mawh pa keh daux phimap, nawh lo pa sigrah phimap ka daux gumlox Siyiex mai ka daux khwan cao, phan ang yuh nan phimap nawh ang nyang luan khaing nawh mai nawh tak baux yaox pa yum ra bawg, kheu phimap tix ka daux meung mawnarok heue. viang mawh kawx nan, viang hoik viex phimap hoek khaing vaig miex tix kawx, phan nawh dohkeut ka phimap tix mai yum rhawm ka cao pa yum tang phimap kawn pwi haktiex khawmuik, pa mawh cao taoh Yesux khrit an, kheu baux keh nawh ka daux khwan mai ka daux krax yum rhawm, nawh mawh pa baux keh ra bawg tix bawg ka daux gum lox Siyiex, viang nawh yum plak tokaux kheu phimap tix kawx, nawh tak im plak khwan kheu bwanson krax moh Siyiex heue. (Romax 6:23) Gum lox Siyiex pa im ju baux tiem ti deuh ahnin,

**Nawh cao deuh taix khawn dawm tix ka piang aux ahnin, Paw vi lhat heue. Aux mawh pa jah mai pa ghoik khaix pa mawh cao pa im ju heue. Aux hoik yum**



**mai ca kawn im leeingju leeingphan, Aux koe jiak saw pa yum mai meung yum heue. (Plak jhi 1:17-18)**

Lheu khaing an phuk lai sigang tix dah baox tiem ti deuh ahnin,

**Kaw pa koe yhaok kieh nawh mhong ceu pa kraih khwan cao ka ceu cao khankix awx. Ka pwi pa pex, krax yum ra bawg tix bawg tak ang pon ti kieh nawh saux heue. (Plak jhi 2:11)**

Mawh kheu Siyiex kied ting lhaong krax moh krax rhawm ka can kawn pwi ka piang haktiex khawmuik, Nawh cao ang koe alo ti kieh pwi tix kaux hoek ka daux krax prawng ciyang phimap heue. mawh kheu nan Siyiex tom tawx Yesux hoek ti mawh cao pa kham geu tang phimap kawn pwi khawmuik, mai kham yum ka piang khaoxlhak heue. can pwi pa rieb ti yum rhawm ka Yesux grawng pa hoik yuh Nawh cao tang phimap tix, nawh ang lai hoek krax prawng ciyang , mai pon ju leeingju ka daux tokaux tix jah yamin tom hoek leeingju leeingphan heue.

**Pa mawh pa hoik yum rhawm ka ceu kaux kawn Siyiex, sonsang tawng pex grawng koe ju leeingju heue. (I Yohan 5:13)**

## **KRAX RA NYAING MAI KHWAN RA CEU**

(လမ်းနှစ်သွယ်နှင့် ဝိညာဉ်နှစ်မျိုး)

Son can kawn pwi piang haktiex in khawmuik, ka son ju khaix sax koe krax ra nyaing ngie khaing heue. Krax an khawm ra nyaing, mawh krax leeingju heue. krax leeingju an, kok mawh krax im ju leeingju ka daux meung raoma mai krax kha leeingju ka daux meung kinkha meung mawnarok heue. ka daux krax an ra nyaing kawn pwi kukaux caw ti laug ti cie tix nyaing heue. phan ang mawh tix nyaing mawh tix nyaing , caw ti laug ti cie mai caw ti laug yamin, kheu ang lai koe akhwang ti laug khaix hoik yum mai khaix hoik luan khaing haktiex in, mawh pa caw ti laug ka daux bawg yam im ju tix, ka daux bawg yamin heue.

**Yesux ahnin, Aux mawh daux krax, pa mawh meh mai ju heue. Phan ang mawh ka daux Aux pwi tix kaux kawx ang pon ti hoek ka keeing cao. (Yohan 14:6)**

Yesux khrit hoik kraik sidawng grawng tokaux Nawh mawh daux krax pa hoek ka daux meung raoma heue. lheu khaing Yesux daux krax pa hu ka daux meung raoma ang lai koe pa ahnan, Nawh cao hoik kraik sidawng heue. Krax pa koe ra nyaing an, mawh krax pa laig daux pa ciyang phimap leeingju mai krax pa laig daux ju pa im leeingju heue. (Mathiex 25:46)

Grawh grawng pa koe krax ra nyaing, mawh jao pa koe khwan ra ceu heue. khwan koe ra ceu ngie khaing pa mawh khwan singax cie Siyiex, mai pa mawh khwan pa lud, khwan pa caox pa mawh khwan phicaox (Satan) heue. ka daux phuk lai sigang kok mawh khwan pa mawh meh mai khwan pa lud heue.

**Ex mawh pa dexdawd mai Siyiex heue. Kaw pa tawng ka Siyiex nghiet lox ex, kaw pa ang dexdawd mai Siyiex ang nghiet lox ex heue. kheu in ex tom tawng ka khwan pa mawh meh mai khwan pa lud heue. (1 Yohan 4:6)**

khwan pa mawh meh mawh khwan pa krub ka Siyiex mai khwan pa yuh alo Siyiex pa mawh khwan Yesux pa singax singeh, pa mawh khwan pa laig dee pa im ju leeing ju heue. (1 kawrinthux 2:12) (Yohan 4:2)

Phan mawh khwan pa lud ang krub ka Siyiex, mawh khwan pa krub ka phicaox, mawh khwan pa seeing brai , pa lud hu khaing krax Siyiex, pa yuh kaing krub ceu pa lud loe kuceu, pa tawx sibawk, pa chawk jhai, pa kok khwan pa vien khwan, pa lhat ka phi caox, pa tawx priex phicaox, pa tawx priex pwi yum pa krub ka pwi yum, pa krub ka simeeig, pa yum rhawm ka miang miex sijax keeing, pa jhak lai tawm taix, pa laug singaix, pa kok khwan pa yuh taoh, pa doeh pa kieh ka grawng camaox caox khaox cien, pa krub ka riang griang, pa krub ka paox kawn pwi, pa seut si-ang ia pa kia: ka siang lig, pa sikah mai pwi yum can ceu ankix khankix heue. (Ping nyab – 11:16, 18:9-14)

Siyiex leeingju mawh Siyiex pa giex pa kwang ka can khwan pa koe kuceu khawmuik heue. Mawh kheu nan phuk lai sigang hoik tiem ti deuh grawng an ahnin,

**Can khwan khawmuik mawh cie Aux heue, Awm pa mawh khwan keeing cie Aux, viang khwan kawn kawx mawh cie Aux heue. can khwan pa lud khankix tak yum ju heue. (Yezajelax 18:4)**

Ka daux pa koe krax khwan son Kawn pwi ra nyaing an, mawh sang hu maix ka daux krax pa yuh ka mawx? Paw tok bawg yam, niied ti laug krax hu tix yam koe bawg yam ka son maix heue. Sonsang pon kawn pwi haktiex khawmuik dee ot pa mhawm daux ju leeingju piang meung raoma, Yesux hoik kok kawn pwi ka lox awn pa ahnin,

**Pex pa taug pa mao mai klawm kraung cien khankix eue, hoek ka Aux, mai Aux tak kieh pex lauxleu tix heue. Teei ti klawm khaox glawm aux heue. mai hoek ti gau mai Aux , kheu aux rhawm pa awn pa tiem, mai ju pex tak yaox dee lauxleu tix heue. (Mathiex 11:28-29)**

## **COX KHRE SON JU KHAIX**

(တမလွန်အတွက် ပြင်ဆင်ခြင်း)

Pwi khawmuik caw ti cox khre son ju khaix, phan ang cox khre, pon ang chix tete telai heue. Grawhgrawng nawh ju kawn pwi ang mawh pa sidah piang haktiex in, mawh pa sang baux thawk ti hu tom ju khaix pa mawh daux ju leeingju heue. Ju khaix koe ka son can kawn pwi piang haktiex in khawmuik khawmleeing heue. kheu kawn pwi mawh pa koe khwan mai pa ang chix grai daux haktiex in ngie, pa sang koe

leeingju heue. Mawh kheu nan ceu pa cox khre ex son ju khaix mawh pa kiied ting ceu mai pa ang yuh ang chix, pa caw ti yuh pa caw ti khre rien ti deuh tete telai lai heue. sonsang cox khre ti deuh son ju khaix an, phuk lai sigang hoik jhi daux krax ka kawn pwi piang haktiex khawmuik awm pa koe daux phuk lai sigang heue.

**Khrawm ti deuh kraung khrai pa mhawm mai jaong pa kaux son tokaux tix son ju phao khaix, sonsang pon kix ju pa im, pa mawh ju tete heue. (1 Temose 6:19)**

Daux ju khaix koe ju ra ceu, pa mawh ju tete mai pa ang mawh ju tete heue. pa mawh ju tete mawh ju pa im leeingju mai pa ang mawh ju tete mawh ju pa kham geu krax kha rhawm leeingju heue. Hoik pon ti tawng grawng an ka daux phuk lai sigang awm pa hoik tiem ti deuh plak piang heue. (Mathiex 25:46)

Son can kawn pwi piang haktiex khawmuik, hoik koe ju in mai ju khaix awm paox tix kukaux pwi heue. Ju in mawh ju piang haktiex pa im ka daux nexnham, mai ju khaix mawh ju leeingju pa mawh son khwan heue. Sonsang laig ka daux ju leeing ju pa mawh ju khaix sax, ju pa im ka daux tokaux nexnham yamin, mawh pa sidaing ting ceu tete heue. Pa im ju yamin mawh son ju khaix sax heue. Phan hoek daux baux ju khaix sax, ang lai koe akhwang ti cox khre tittix, mawh ju pa im piang haktiex in pa mawh baux ju pa cox khre son ju khaix heue. Daux phuk lai sigang hoik krai ti deuh grawng ju khaix, mai grawng pa hoek khwan kawn pwi khawmuik ka dee an pa mawh daux ju pa im leeingju, phan ang mawh nan pa mawh daux ju pa kha rhawm dee kin kha daux meung mawnarok leeingju heue. (1 Timose 6:17-19) Son ju khaix an, caw ti laug cie ka daux ju in heue. son ju khaix sax, ang lai koe akhwang ti laug daux ju khaix, mawh pa caw ti laug yamin dommawx doman, kheu ju ang koe daux taix kawn pwi, mawh pa koe daux tai Siyiex tix kaux ngie khaing heue. Phuk lai sigang baox tiem ti deuh ahnin,

**Can kaing pa sang yaox maix ti yuh khankix, coca maix sau riang ti yuh awx. mawh kheu ka daux meung yum pa sang hu maix an, can kaing pa yuh angah, krax keut krax gau angah, krax pa tawng yung angah, ping nya cuyi angah ang lai koe tan. (Sidiex 9:10)**

Pa cox khre son ju khaix mawh pa yum rhawm mai pa rieb ti teei ka gumlox Siyiex pa im ju pa ang koe pa pie lhen, pa mawh gumlox pa mawh meh, pa kaux pa cong ku ju leeingju leeingphan awm pa koe plak greem in khankix heue.

- (1) caw ti yum rhawm ka Siyiex cao pa phan pa yuh, pa mawh Siyiex cao pa jah cao pa sidah, Siyiex pa grum naog mai siavp sibrawm khawmuik, pa mawh Siyiex cao pa giex kwang ka can pa koe kuceu khawmuik, pa mawh Siyiex pa tawng ka kuceu khawmuik, pa koe leeingju, pa ang chix tieh loh tix bawg kawx, pa mawh Siyiex piang siyiex cao piang cao, pa koe tix kaux khaing heue.
- (2) Caw ti rieb yum rhawm grawng pa mawh kawn pwi haktiex khawmuik kawn phimap, kheu hoik hawt Adam mai Evax lox nyaw glaw phicaox tom yam jah dixdix heue.
- (3) Mawh kheu phimap kawn pwi yaox ti hoek ka daux meung mawnarok, pwi tix kaux kawx ang chix pon luan khaing mawnarok kheu riang rao tokaux tix, ang chix pon luan kheu krax mhawm pa yuh tokaux tix, ang chix pon luan kheu krax pa coca ti yuh tix ceuceu, kawn pwi khawmuik ang koe akhwang pa pon luan khaing phimap tix, kheu kaing tix ceu kawx pa ah nan, caw ti rieb yum rhawm ka daux rhawm rhi tix tete telai heue.
- (4) Yesux khrit mawh kawn Siyiex pa singax pa mhawm kawx, mawh kheu kied moh Siyiex ka kawn pwi, mai koeng ka phimap. Nawh cao ploi kawn tix Yesux hoek mai teei nexnham pakpeung kawn pwi, kham ti yum son phimap pwi hak tiex uik, daux loe ngaix Nawh deeh kaoh im, khaix an tix pon ngaix, Nawh haok ka daux meung rao ma pa ah nan, caw ti rieb yum rhawm ka daux rhawm rhi tix tete telai heue.
- (5) Caw ti rieb yum rhawm ka Yesux grawng mawh Nawh kawn Siyiex cao pa taoh kawn pwi khaing daux phimap mai mawnarok, mai phan ang mawh kheu Yesux, pwi tix kaux kawx ang pon luan khaing mawnarok heue.
- (6) Caw ti rieb yum rhawm ka grawng mawh Yesux Siyiex piang khawmuik pa mawh Siyiex pa pex ka alo pwi, mai pa pex ka phicaox kuceu mai pa pex ka sibrawm meung yum mai pa pex ka tokaux nexnham pwi, pa pex ka ju pa mawh tivud mai pa tawx akhwang pa pex ka can pwi pa yum rhawm ka Nawh khawmuik heue.

(7) Can pwi pa yum rhawm ka Yesux khrit khawmuik khawmleeing, ang lai hoek krax laux leeing, tak pon ju leeingju, jah ka daux bawg yam pa jah Nawh ti yum rhawm heue. Khaix an nawh hoik kaux rhawm ka krax taoh son ju khaix mai nawh koe krax keut pot jun pot son meung raoma, kheu hoik pon nawh krax taoh pa tawx Yesux heue. Nawh tak lih mawh pwi pa koe krax keut pot jun pot mai nawh tak gaux rhawm daux kaing ceu pa rahsee, mai kaing ceu pa mhawm pa mhiem kuceu, nawh tak chix gun yeung ka daux krax kharhawm kuceu, nawh yaogyaw bwanson Siyiex mai rawg bwon mai kham mhai rug grawng lox bwon gauxrhawm krax taoh Yesux heue. Nawh tak sang thieang ti tik ka alo nexnham mai tak yuh alo Siyiex heue. Mawh kheu hoik mawh nawh kawn Siyiex , nawh tak ot ka daux krax moh Siyiex mai nawh tak yuh pa khaw pa caw ka rhawm rhi Siyiex daux krax im ju tix ku singaix heue.

Mawh kheu hoik mawh nawh kawn Siyiex pa singax, nawh taksang im ju son Siyiex ka daux pa koe bwon son son kaing ceu pa mhawm kuceu heue. Nawh gaux rhawm gauxrhi daux alo Siyiex mai ka daux kaing ceu pa koe bwanson kuceu, mawh kheu can kaing pa yuh pwi yum rhawm khankix piang haktiex in khawmuik, hoik priex ti kieh mawh sin meung raoma ka son pwi pa yum rhawm pa ap pong jut ix khawmuik heue.

**Grawhgrawng nawh tak sang kieh ex khawmuik sidawng ka sivoe dee ngawm cao khrit ti prawng ca, sonsang pon kaux pwi mawx kaux pwi an ka ceu pa hoik yuh tokaux tix, awm pa khaw mai pa hoik yuh nawh kaing ceu pa mhawm angah mai kaing ceu pa caox angah heue. (2 Kawrinthux 5:10)**

**Kawn kawn pwi tak hoek ka daux min plak ngai keeing tix, tau mai kawn cau Siyiex khankix, Yam an Nawh cao tak tawx ka pwi kukaux awm pa hoik yuh tix kaux pwi mawx kaux pwi an heue. (Mathiex 16:27)**

Can pwi pa yum rhawm ka cao taoh Yesux khrit kukaux daux pwi, mawh kawn praix pa yuh alo Siyiex daux bawg yam pa im ju tix, mawh pa tawx tokaux tix ti mawh kraung pa shiao ka son kaing jhaw Siyiex mai pa yuh min plak ngai Siyiex sidawng ka daux krax pa im ju tix heue. Tokaux muceu angah, rhawm keut dong sawn angah, lox ah sikah krai angah, rhawmrhi mai ju khwan, khawm ngai jhak yhaok mhong khawmuik, mawh pa hawt yuh alo Siyiex mai mawh mhai rug son Siyiex heue. Graw

gawng nawh can kaing pa yuh mai krax im ju pwi yum rhawm khawmuik, ang lai chix mawh pa giexgoing tix bawg kawx, son piang haktiex in mawh pa kieh Siyiex koe min plak ngai kah, mai son meung raoma daux ju khaix sax, mawh totaix bwanson pa sang pon khaing Siyiex heue. mawh kheu nan daux phuk lai sigang baoux tiem ti deuh ahnin gawng an,

**Kaing pa yuh kaux pwi mawx kaux pwi an, taksang kieh sidawng kah heue. Grawh gawng nawh ka daux sigaix an taksang plak jhi nawh ka daux ngu mai ngu an nongnong taksang cheu ti yax ka kaing yuh kaux pwi mawx kaux pwi an, gawng mawh kaing pa yuh ka mawx heue. Phan kaing pwi tix kaux kaux pa hoik gawp nawh ti sum ka piang num an kawn kaux cong, kaw an tak sang pon bwanson heue. Phan kaing tix kaux kaux hoik proe, nawh tak sang som nai heue. viang mawh nan to kaux tak sang hoek krax taoh, mawh awm pa hoik bhoek nawh khaing ngu heue. (1 kaw rinthux 3:13-15)**

Mawh kheu krax yum rhawm mai kheu bwanson Siyiex kawn pwi pon krax taoh heue. can pwi pa pon krax taoh kukaux tak sang cox khre tix son bawg yam pa sang teei haok, mai bawg yam pa deeh hoek Yesux ra bawg tix bawg, mai cox khre tokaux tix son meung raoma daux ju leeingju heue. Sonsang pon ka totaix pa sang tawx ka pwi pa sau riang rao ti yuh alo Siyiex khankix, pa hoik deuh ka daux meung pa koe sivoie pwi yum rhawm khawmuik, caw ti viex rhawm kua mai kaux sijax tom sidah hoek ka mhai, pa koe plak sivoie ngai ex tan heue. mawh kheu nan, viex rhawm rah see, teei riang rao ka gumlox Siyiex pa ting siawp sibrawm mai pa grum naog mai krax pa pex mai kieh kaux cong baoux hu tom sidah krax, tom sidah hoek dee ot pa mhawm leeingju tau mai Siyiex ex heue.

## **PWI PA HOIK PON PA KAUX RHAWM SON JU KHAIX**

(တမလွန်အတွက် စိတ်ချမှရရှိသူ)

**(1) Nawh mawh pwi pa hoik lawdluan khaing tawm taix satan mai khaing phimap**

Pwi mawx angah phan nawh hoik yum rhawm ka krax moh Siyiex mai grawng pa kham Yesux ti yum tang phimap tix mai Yesux hoik tawx ngawh phimap nawh ka piang khaoxlhak khawmuik , pwi an, nawh hoik bhoek hoik luan khaing tawm taix phicaox Satan, mai hoik lawdluan khaing pa ciyang phimap mai hoik pon krax pa sivat daux bwanson krax moh Siyiex heue. Phicaox Satan mai phimap, ang lai pon kheem pon kwang ka nawh, kheu hoik tawx Siyiex akhwang pa lawdluan ka nawh khaing phimap heue.

**Mawh kheu hoik kieh pex luan khaing phimap, pex hoik lih mawh siliex pa rahsee heue. (Romax 6:18)**

(2) **Siyiex ang lai doh keut ka phimap pa hoik lud loe nawh pie tix bawg kawx**

Pwi pa hoik pon pa kaux rhawm son ju khaix, kheu hoik yum rhawm nawh ka Yesux khrit, mai kheu nawh ot ka daux krax moh Siyiex mai krub ka Siyiex pa im ju, pa mawh Siyiex pa mawh meh , Siyiex ang lai baox doh keut ka phimap nawh, kheu phimap pa lud loe nawh hoik hoek ka piang Yesux, kheu krax yum rhawm mai kheu bwanson Siyiex heue.

Yam hoik rieb nawh ti yum rhawm ka Yesux, mawh yam teei Yesux ti klawm ka phimap nawh khawmuik, mawh kheu phimap pa hoik hoek ka piang Yesux an, Siyiex ang lai doh keut ka phimap nawh, jao pa hoik teei Yesux ka phimap an khaing nawh uik heue.

**Nawh baox ah nin, Aux tak ang lai baox doh keut ka phimap mai ka jhawm lud kix heue. Dee koe ceu pa luan khaing phimap khankix, ang lai baox tan ka son phimap heue. (Hebrie 10:17)**

(3) **Siyiex hoik tawx ngawh phimap nawh (2) son**

Yam pwi tix kaux kaux koe taik (ceuk) ka cao mi tix kaux kaux tix rheng sien, kheu pwi pa koe taik (ceuk) an ang lai pon sap pon pheuex taik ceuk tix ka tax cao mi an, tax cao mi an sang kieh kaw pa koe ceuk an ot daux thawng tom sidah ju nawh heue. Yam mhong cao mi tang kaux tix kaux ka grawng an, pa kied ting krax moh krax rhawm ka pwi, nawh teei mau cie tix ra rheng sien mai viex ti hu tawx ka tax cao mi pa ploi ceuk an nawh deeh viied deeh pheuex ceuk tang kaw pa koe ceuk an heue. Nawh ahnin ka tax cao mi pa ploi ceuk an, mau



pa ceuk kaw in ka maix tix rheng sien an, aux sang viied dee pheuex tang nawh ra son, caw ra rheng sien heue. Mawh kheu hoik viied tax caomi pa koe krax moh krax rhawm an ka ceuk kaw pa koe ceuk an, nawh ang lai yaox ti laig ot daux thawng heue. Awm an, pwi mawx angah pa yum rhawm ka grawng pa hoik viied Yesux ceuk phimap tokaux tix ra son, nawh ang lai koe ceuk ka phimap. Mai nawh hoik pon ka pa hoik tawx ceuk tix ra son heue.

**Krai lox nyawm rhawm ka veng Yerusalieim mai ka meung an, naing ang lai koe son maix mai phimap maix kawx hoik ploi khaing maix, Nawh hoik rieb ti kham phimap khaing Siyiex mawh phimap ra son khaing maix. (Isayah 40:2)**

**(4) Siyiex hoik tik phimap nawh plak khaix Tix khawmuik**

Can phimap pwi pa yum rhawm ka cao khrit, Siyiex ang lai deuh an sivoengai Nawh Cao, mai hoik tik ka plak khaix Tix khawmuik heue. Siyiex ang lai een lai sawn ka phimap can pwi pa yum rhawm ka Yesux, kheu hoik yum rhawm nawh ka pa hoik tawx Yesux ngawh phimap nawh khawmuik heue. can pwi pa yum rhawm ka Yesux khawmuik, Siyiex hoik kieh phimap kix laux leeing nyao paklawg, ang lai kieh deuk pie ceeix kawx heue.

**Aux hoik moi khaing jhawm saux mai hoik caux rhawm ka ju aux, taoh ka aux khaing daux pa laux leeing, maix cao hoik tik phimap ka plak khaix Tix heue. (Isayah 38:17)**

**(5) Siyiex hoik tawb ka phimap nawh khawmuik**

Siyiex ang khaw ka phimap, grawhgrawng nawh phimap mawh pa yuh phicaox mai mawh pa seeing brai, pa ang mhawm plak sivoengai Siyiex pie tix bawg kawx heue. Siyiex kied sidaing khreeing ka phimap, viang mawh nan Nawh Cao moh ka kawn pwi phimap , mawh kheu kawn pwi mawh kawn pa phan pa yuh Siyiex awm riang pak peung cao Nawh heue. Mawh kheu nan Siyiex ploi kawn pa moh tix Yesux, hoek ti mawh cao kham phimap kawn pwi, mai geu ti yum piang khaoxlhak tang phi map kawn haktiex, mawh kheu nham pa jauh lih khaing Nawh cao an, sighrah ti tik ka phimap kawn pwi haktiex uik, can pwi pa yum rhawm ka Nawh cao khawmuik , pon krax taoh mai nham Yesux tawb ka phimap pwi pa yum rhawm ka Nawh khawmuik heue. Yam jhak

Siyiex ka phimap kawn pwi, ang lai yaox ka phimap pwi yum rhawm, kheu nham Yesux hoik tawb ti deuh kieh glip khawmuik, Siyiex yaox ka nham pa tawb ka phimap, mai ang lai yaox ka phimap koe daux pwi pa yum rhawm ka Yesux heue.

**Maix hoik pluat ploi phimap pwi maix khankix mai hoik kheem ka phimap kix khawmuik heue. (Yaog yaw 85:2)**

**(6) Hoik Prawng hoik yuh phimap nawh kieh singax khawmuik**

Can grawng krax pa lud loe pwi phimap khawmuik, Yesux hoik kieh Singax uik, mai hoik prawng hoik yuh grawng phimap an hoik khawmuik khawmleeing, ang lai deuh ceeix kawx heue. Yam kham geu Yesux ti yum tang phimap kawn pwi ka piang khaoxlhak, sivoe sang dud rhawm Nawh cao, Nawh ploi lox tix ahnin, hoik hoik khawmuik heue. Pa ploi Yesux lox an mawh krai Nawh cao grawng pa hoik hoik krax prawng phimap kawn pwi mai ang lai kieh phimap an hoek ka piang kawn pwi haktiex heue. Can pwi pa yum rhawm ka gurmlox an, ang lai yaox ti kham grawng phimap tokaux tix, kheu Yesux hoik kham tang nawh mai hoik yuh grawng phimap hoik khawmuik heue.

**Mawh kheu nan khaix hoik ih Yesux rawm sidah niex, Nawh cao ahnin, hoik hoik khawmuik, Nawh cao nom kaing mai deeh tawx khwan tix heue. (Yohan 19:30)**

**(7) Nawh hoik pon ti cie ju leeingju**

Can pwi pa hoik mhong gumlox Siyiex pa im ju mai yum rhawm ka gumlox an, yam an khwan cao laig ot ka daux nawh mai nawh lih mawh pwi khwan, kheu khwan cao hoik kwang ka daux krax pa im ju nawh heue. Yam laig khwan cao khrit ti kwang ka daux nawh, mawh yam hoik pon nawh ti cie ka ju leeingju heue. Viang nawh kawn ot piang haktiex kawx, ju leeingju hoik koe ka daux nawh mai hoik mawh cie nawh heue. (1 Yohan 5:13)

**Kaw pa pon kawn cao pon ju an heue. Kaw pa ang pon kawn Siyiex ang pon ju an heue. (1 Yohan 5:12)**

**(8) Nawh hoik laig ceu kaux ka daux phuk lai carang im ju**

Can pwi pa yum rhawm ka Yesux kukaux, Siyiex tak mhai ti deuh ceu kaux kix ka daux phuk lai carang im ju, ka daux meung raoma heue. Mawh

kheu hoik laig ceu kaux nawh ka daux phuk lai carang im ju, ang lai baoux deeh preet ceukaux nawh khaing lai carang an pie tix bawg kawx heue.

**Ceu pa seeing brai, phan ang mawh nan kaw pa yuh ceu pa greeing mai pa pie lhen, ang pon ti laig tan, viang mawh nan, mawh ngie kix pa hoik tiem ka daux phuk lai pa im ju kawn yung khaing, pa pon ti laig kah heue. (Plak jhi 21:27)**

**Ka kaw pa pex taksang kieh ceep ka kraung paing yuh nin heue. Aux tak ang doh preet ti tik ceukaux nawh khaing phuk lai pa im ju, Aux tak sang kham grawng ceu kaux nawh sivoe keeing Aux, mai sivoe kawn cau cie Nawh khan kix heue. (Plak jhi 3:5)**

**(9) Nawh hoik pon akhwang pa laig ot ka daux meung raoma**

Can pwi pa hoik laig ceukaux ka daux phuk lai carang pa im ju kukaux an, nawh hoik pon akhwang pa laig ot ka daux meung raoma heue. Viang nawh ang nyang laig hoek tan kawx, nawh hoik pon akhwang pa laig ot ka dee an heue. Inkix mawh bwanson pa tang siyox, pa yuh Siyiex son pwi pa moh ka Nawh, pa mawh pwi pa moh nawh cao kah heue. Ceu ankix mawh pa lang teung mhawm mai pa lang teung tang siyox khaing kuceu heue. Mawh kheu jao an, phuk lai sigang tom baoux tiem ti deuh ahnin grawng an,

**Aux krai lox tete ka pex, kaw pa mhong lox Aux mai yum rhawm ka cao pa ploi Aux hoek, hoik koe ju leeingju mai ang lai hoek krax prawng ciyang , hoik luan khaing krax yum laig ka daux krax pa im ju heue. (Yohan 5:24)**

**(10) Nawh hoik pon akhwang pa mawh kawn Siyiex**

Sivoe ang bax nyang pon mhong gumlox Siyiex, mai yam ang nawh nyang bax yum rhawm ka cao taoh Yesux, nawh mawh pwi phimap mai mawh kawn phicaox, nawh mawh siliex phimap mai mawh kawn cau phicaox heue. viang mawh kawx nan khaix hoik pon mhong nawh gumlox bwan Siyiex mai yum rhawm ka cao taoh Yesux khrit, nawh pon akhwang ti mawh kawn Siyiex heue. mawh kheu nan can pwi pa rieb ti teei mai yum rhawm ka Yesux kukaux, hoik pon akhwang ti mawh kawn Siyiex heue.

**Pwi pa rieb ka Nawh mai pwi pa yum rhawm ka ceu kaux Nawh khankix Nawh tawx akhwang ti kieh mawh kawn Siyiex heue. (Yohan 1:12)**

**PA TEEI HAOK MAI MEUENG RAOMA**

(ခရစ်တော်မြတ်၏အမည်ကိုခေါ်ဝေါ်ခြင်းနှင့်တောင်းတင်နိုင်စွမ်းတော်)

Pa teei haok pa ah nan, sang ah ka pa teei Siyiex ka ceucao pa koe piang haktiex khawmuik haok ka piang raoma, phan ang mawh nan pa teei ka can pwi pa yum rhawm khankix khawmuik haok ka piang meung raoma dee long heue. Bawg yam pa teei haok an hoik kied dex tete mai hoik dex sang hoek bawg yam, mawh kheu nan phuk lai sigang hoik tiem ti deu ah nin,

**Bawg yam hoik naog, mai meung Siyiex dex sang hoek , doh keut ka phimap mai yum rhawm ka lox bwan gaux rhawm heue. (Makux 1:15)**

Pa teei haok ka pwi yum rhawm khaing haktiex in mai yaog haok ka piang raoma dee long an, mawh pa viex haok ka daux meung Siyiex heue pa teei haok, mawh pa shiang mai pwi yum rhawm ngie khaing mai ang mawh pa dex pa shiang mai pwi pa ang yum rhawm, mawh pa hoek Siyiex ti yaog teei ka pwi pa pon krax taoh, ka pwi pa ang lai dex dawd mai haktiex, pa mawh pwi pa hoik kham ti rieb ka Yesux, pa mawh pwi Siyiex heue. Can pwi yum rhawm pa hoik yum mai can pwi yum rhawm pa kawn im khankix khawmuik, viex tau ka daux pa teei haok daux meung raoma heue. Bawg yam pa teei Siyiex ka pwi yum rhawm khankix haok ka daux meung raoma an, pwi tix kaux kawx ang pon ti tawng, mawh kheu pwi tix kaux kawx ang chix tawng ka bawg yam an, Yesux khrit tom nhie pwi yum rhawm khawmuik dha ti priex rien rhawm rhi tix, mai paw ot giexgoing , kieh mawh pwi pa hoik cox khre tix sivoe bawg yam singaix an heue. lox tawm jhawm krai Yesux son daux bawg yam singaix an hoik tiem ti krai mhai ti deuh daux phuk lai sigang sidu sidawng heue.

**Mawh kheu nan rienrhawm pex kheu pex ang tawng bawg yam singaix sang hoek cao pex heue. yuh ti tawng ka ceu in, phan cao nyiex tawng ka bawg yam sang hoek pwi briex nawh tak pau mai ang kieh yieh ti laig ka daux nyiex tix heue. Mawh kheu nan pex kawx rien rhawm tix, kheu daux bawg yam pa ang pex ce, kawn kawn pwi tak sang hoek heue. (Mathiex 24:42-44)**

Ka daux bawg yam singaix an sax, can pwi yum rhawm mai pa hoik laig ti ka daux cao khrit, pa hoik yum khankix khawmuik, kix taksang hoek tau mai cao khrit ka daux bhawm dee long, sivoe pwi yum rhawm pa kawn im khankix heue. Yam an sax pwi yum rhawm pa kawn im mai pa hoik yum khawmuik tak sang sipub paox tix tau mai cao khrit mai ot tau mai Nawhcao heue. Viang mawh kawx nan, phan mawh pwi

yum rhawm pa im khankix, kix ang lai haok mai tokaux im in, kix taksang tieh loh ka daux tivud, daux tix ghiep ngai ngie mai tokaux pa mawh nexnham pa chix cux sium, tak tieh loh ti mawh tokaux pa ang lai chix cux sium, grawhgrawng nawh pa chix cux sium in tak ceep ka pa ang chix cux sium mai pa chix yum in tak ceep ka pa ang chix yum heue. (1 Thesalonix 4:15-17)

**Aux taksang krai ka pex lox pa raux pa mox tix ceu, ex can pa koe khawmuik , tak ang lai laig it, ex khawmuik taksang tieh loh ka daux tivud khaing, ka daux tix ghiep ngai khaing , yam phlu teettawng bawg ghoik khaix heue. Grawhgrawng nawh taksang phlu teettawng mai taksang deeh kieh pa yum kaoh ka pa ang chix cux sium, mai ex tah sang tieh sang loh kah heue, grawhgrawng nawh ceu pa chix cux sium in, tak sang ceep ka pa ang chix cux sium, mai ceu pa chix yum in, taksang ceep ka pa ang chix yum heue. (1 Kawrin thux 15:51-53)**

Can pwi pa ang yum rhawm mai pa ang rieb ti teei Yesux mawh cao taoh tix khankix khawmuik, kix tak deuk taksang dah ka piang haktiex in, kix taksang yaox ti kham geu ka krax kham krax geu kuceu ka piang haktiex in heue. Ka daux pwi pa deuk tomnie an, phan pwi mawx yum rhawm ka Yesux mai tieh loh tix khaing phimap tix mai deeh hoek ka Siyiex cao pa phan pa yuh tix, tak sang pon krax lawdluan khaing phimap mai pon akhwang pa laig ot ka daux meung Siyiex heue. ka daux pwi pa deuk an phan koe krax doh keut mai krax yum rhawm, Siyiex kawn sang baox kieh kix laig ka daux meung raoma khawmuik, viang mawh kawx nan, kix tak kawn yaox ti kham geu ka krax kham krax geu kuceu, ka daux bawg yam pa lang teung nu pa lang teung kin, pa mawh bawg yam pa ting krax kham geu kawn pwi ka piang ca haktiex in khawmuik heue. Son ang sang mawh pa yuh nan, sonsang mawh pwi pa hoik koe krax doh keut mai pa koe krax yum rhawm, pa mawh meh, pa khaw caw mai alo Siyiex mai pa rien rhawm, pa hoik cox khre tix mai krox jun ka bawg yam pa sang lih bleeh Yesux khrit heue. Grawhgrawng nawh hoik tiem ti deuh daux phuk lai sigang pa ahnin,

**Mawh kheu yam an taksang koe pa kied kharhawm ceu pa ang sax koe tom yam jah ti kaw haktiex dix, tom sidah hoek bawg yamin, khaix an kawx tak ang lai baux koe heue. Phan bawg yam singaix an khankix ang mawh singaix pa dawd, tix kaux kawx ang pon ti luan, viang mawh nan son pwi pa hoik laug Siyiex, taksang mawh bawg yam singaix pa dawd heue. (Mathiex 24:21-22)**

Siyiex leeingju mawh Siyiex can pwi pa koe kuceu kuru, pa mawh kawn pwi pa koe ka piang haktiex in khawmuik khawmleeing heue. Siyiex mawh keeing ka kawn pwi khawmuik mai mawh cao phan cao yuh mai mawh cao piang cao Siyiex piang Siyiex, pa mawh cao pa ting krax moh krax rhawm, pa mawh cao pa moh ka kawn pwi khawmuik khawmleeing heue. Siyiex hoik tawx ti deuh akhwang pa lawdluan ka pwi khawmuik khawmleeing mai hoik tawx bawg yam im ju ka kawn pwi sonsang niied kawn pwi khawmuik ti doh keut doh sawn ka phimap tix mai deeh hoek ka Siyiex, mai hoik tawx ti deuh gumlox bwan pa im ju pa mawh lox bwan pa gauxrhawm gauxri, pa mawh lox tat jhawm prawng pa rahsee, pa singax singeh, pa taoh pwi khaing daux phimap, mai pa tawx ju leeingju ka can pwi pa rieb ti yum rhawm khankix khawmuik heue. Sivoe ang Siyiex nyang bax yuh ka kaing pa tang pa siyox pa ting pa lhaong tix ceu ceu ka piang haktiex in, Nawh cao kawn dha ti kieh kawn pwi tawng kaing pa sang yuh tix, ku jheengjheeng heue. Phan ang tawx kawn pwi tawng ka ceu pa sang lih ti mawh khan kix Nawh cao ang nieb yuh kaing pa tang siyox ankix, kheu Siyiex mawh Siyiex pa mhawm mai pa grum naog mai krax moh krax rhawm tau mai krax cauxrhawm cauxri heue. Daux baux ju Noax dix, Siyiex sighrah haktiex ka rawm mai kieh rawm thawm ka piang haktiex in khawmuik khawmleeing heue. Sivoe bawg yam ka ang rawm nyang bax kheem ka haktiex an, Siyiex hoik dha ti tawx lox ka Noax mai ka pwi piang haktiex tom rheung bawg Yam heue. nawh kieh Noax tawx satix ka kawn pwi mai nhie pwi doh keut ka phimap tix heue. (Lai Yam jah siminting 6) mawh kheu kawn pwi ang cu ang nghiet ka lox tawm jhawm krai Siyiex, Siyiex kieh rawm thawm mai kheem ka piang haktiex uik mai lheu khaing geh nyiex Noax, pa koe piang haktiex khawmuik hoik lauxlak pakleeing nyao: ka daux rawm heue. Awm an nang, yam sang ciyang Siyiex ka phimap pwi meung Ijiptux, Siyiex tawx lox kieh Arun mai Mose mawh pa tawx satix, grawng sang ciyang Siyiex ka meung kix heue. mawh kheu simiang pharaw pa mawh simiang ting meung Ijiptux, ang cu ang nghiet ka lox tawx

satix grawng an, Siyiex ciyang tawx krax kharhawm ka daux meung an (10) ceu heue. (Lih hu simin ting 7 tom sidah 12) . Khaix an Yam yaox Siyiex pa kied ting phimap pwi pa koe ka daux veng Nineve, Siyiex kieh Yonax tawx satix ka pwi veng an heue. (Yonax simin ting 3)

Yam ciyang Siyiex veng Sawdom mai Gawmorax ka ngu mhat dix, Siyiex hoik dha ti kieh kawn cau raoma khankix hoek ti tawx satix ka pwi pa koe ka daux veng ankix heue. viang tawx satix mai krai ka kix mhong gumlox Siyiex mie ding kawx, kix ang cu ang nghiet mai kix kawn baox ah lox ang cee ang cak ka kawn cau rao ma, pa ploi Siyiex hoek an khankix heue. (Yam jah simin ting 19)

Ka daux bawg yam singaix in Siyiex hoik tawx satix ka kawn pwi pa koe ka piang haktiex in khawmuik khawmleeing mai kieh Yesux khrit lih hoek ti mawh cao kham yum tang phimap kawn pwi haktiex khawmuik heue. Siyiex ploi kawn pa moh tix Yesux hoek ti teei phimap haktiex mai kieh Yesux hoek tawx satix ka kawn pwi grawng pa koe krax prawng ciyang kheu phimap mai grawng pa sang hoek bawg yam sidah haktiex, son pwi pa koe khawmuik khawmleeing khawmmu khawmmiang heue. Siyiex kieh ceucao khankix krai grawng krax taoh mai krai gumlox bwan gaux rhawm gauxrhi mai tawx satix grawng meung raoma hoik dex sang hoek heue. ka daux baux in singaix, phuk lai sigang cie Siyiex pa mawh lai grawng lox tawm jhawm krai Siyiex pa im ju, hoik tah hu ka piang haktiex kudah kudee, ceu pwi pa koe, piang haktiex in 2537 ceu, hoik koe phuk lai sigang ceu mawx ceu an mai hoik yang: ti ruad roi hu piang haktiex kudah kudee, an mawh pa tawx Siyiex satix ka kawn pwi sonsang tawng pwi khawmuik ka Alo Siyiex mai pa sang lih mawh bawg yam pa sang hoek heue. khaix an Siyiex laug ti teei ka cao sidiex cao gau pa mawh pwi pa yuh kaing jhaw Siyiex mai laug ti teei ka kawn khrit pa mawh pwi yum rhawm tomnie, sonsang mawh kix pa toe lox sikah Siyiex ka pwi haktiex khankix heue. can cao sidiex mai pwi yum rhawm khawmuik, hoik mawh kawn cau mau soi Siyiex, sonsang tawx satix grawng sang hoek meung Siyiex mai grawng sang lih bleeh Yesux piang haktiex in ra bawg tix bawg heue.

Ka piang haktiex khawmuik kudah kudee, hoik hoek lox grawng krax taoh pa mawh grawng pa moh Siyiex ka kawn pwi haktiex mai hoik dex sang sidah hu ka piang haktiex in ku dahdee, ku praix ku klawng ku gawng ku ngawd heue. Dee hoek

cao sidiex pwi pa yuh kaing kraik lox bwan angah, dee hoek lai grawng krax taoh pa mawh lai ruad roi son gumlox bwan angah, dee ang pwi mai lai chix pon hoek, dee hoek lox sidiex daux cag bhaung mai dieb cax rieang im kuceu angah, hoik tah hu piang haktiex kudah kudee heue. Teu kawn koe tix dahdah nhiex, pa ang nyang pon yaox ti mhong pon ti tawng grawng krax taoh heue. sonsang doh keut pwi khawmuik ka phimap tix, mai sonsang yum rhawm pwi khawmuik ka Yesux cao taoh, gumlox Siyiex hoik ahnin, Yesux khrit sang lih hoek ka daux bawg yam pa dawd pa ang lai rheung heue. Nawh tak sang hoek ti teei haok ka pwi pa yum rhawm kukaux mai tak viex ing daux meung raoma, sonsang ot tau mai Siyiex leeingju leeingphan heue. can pwi pa doh keut ka phimap tix mai yum rhawm ka Yesux grawng mawh nawh cao taoh khaing daux phimap mai khaing meung mawnarok, Nawh tak pon ju pa im leeingju mai pon sin meung Siyiex pa ang chix laux leeing pa kaux pa koe leeingju leeingphan heue.

**Lheu khaing an, kheu tawng ka bawg yamin pex tawng grawng pa hoik hoek bawg yam pa caw pex ti siduad khaing it tix, grawhgrawng nawh krax taoh nie lheu dex ka ex yamin khaing yam jah ex ti yum rhawm heue. Bawg yam pon sawm dex sang hoik, mai bawg yam pon ngaix dex sang hoek heue. mawh kheu nan kieh ex peeik ti tik kaing pa dex mai pa faik mai kieh ceep kraung naing pa rieang heue. kieh ex hu ka daux pa khaw caw awm yam pon ngaix, ang mawh ka daux pa silao ka pwie mai pa yoek ka plai, ang mawh ka daux pa kraing pa nieb yuh hawt alo nexnham, ang mawh ka daux pa simah simaing mai pa boh rhawm heue. viang mawh nan pex teei ti ceep cao Yesux khrit mai paw keut paw cox son nexnham, sonsang kieh alo nexnham grum naog heue. (Romax 13 : 11 - 14)**

Pwi ku kaux tak kawn sang yaox ti cung sivoe dang ngeung dee prawng heue. Can kaing pa yuh pwi kaux mawx kaux an, tak sang sidawng ka daux bawg Yam an sax heue. Can pwi pa ang rieb ti teei ka Yesux kieh mawh cao taoh tix, nawh sang hoek krax prawng krax ciyang mai pwi pa yum rhawm ka kawn Siyiex pa koe tix kaux khaing, krax prawng krax ciyang, ang lai hoek ka piang nawh, tak pon ju pa im leeingju leeingphan ka daux meung raoma pa mawh meung pa gauxrhawm leeingju pa kok mawh meung Siyiex heue.



**Ex paw kieh laux rhawm ka yuh ceu pa mhawm mhiem, grawh grawhg nawh yam hoek bawg yam, ex taksang pon ti vawg, phan ex ang khrup rhawm heue. mawh kheu in, yam yaox ex dee pon ti yuh, kieh ex yuh ceu pa mhawm ka pwi khawmuik mai nie lheu mawh ka kix pa mawh pwi geh nyiex krax yum rhawm heue. (kalatix 6:9-10)**